

ՄԱՏԵՆԱՀԱՐ “ՄԱՍԻՍ”, ԲԻՒ 24

ԵՐՈՒԱԿՆԴ ՕՏԵԱՆ

ԱԶԳԱՅԻՆ ԲԱՐԵՐԱՐ

ԵՐԳԻԾԱԿԱՆ ՊԱՏՄՈՒԱԾՔ

ԱԶԳԱՅԻՆ ԿԵԱՆՔ



PRINTED IN BULGARIA

1936

ՑԱՌԱՐՈՒԹՅՈՒՆ - ՄԱՍԻՍ,
ՍՊԱՀԱԿԱՆ

891.99

0-79

891.99
0-79

30 JUL 2010

NOV 2011

ՄԱՏԵՆԱԴԱՐ “ՄԱՍԻՍ”, ԲԻՒ 24

ԵՐՈՒԱՆԴ ՕՏԵԱՆ

ԱԶԳԱՅԻՆ ԲԱՐԵՐԱՐ

ԵՐԳԻԾԱԿԱՆ ՊԱՏՄՈՒԱԾՔ
ԱԶԳԱՅԻՆ ԿԵԱՆՔԵ



PRINTED IN BULGARIA

1936
ՏԱՐԱՎՈՒԹՅՈՒՆ - ՄԱՍԻՍ,
ԱՌԵՆԻ.

ԱԶԳԱՅԻՆ ԲԱՐԵՐԱՐ

Ա.

Մ. Գիւղի խաղաղիկ հայ բնակիչներուն համար մեծ գէպք մը համարուեցաւ, երբ Սահակ էֆ. Կաչուտէրեան, բժիշկներու խորհուրդով, Բերայէն հոն փոխազրուեցաւ ընտանիքով:

Սահակ էֆ. ծանօթ դէմք մըն էր Կ. Պոլսոյ հայերուն մէջ: Վաճառական, Թաղական և Դատաստանական Խորհուրդներու անդամ, յանձնաժողովներու կը մասնակցէր, մասնախումբերու խորհուրդ կու տար, ծանօթ անձնաւորութեանց յուղարկաւորական թափօրին կը հետեւէր. Փոխան ծաղկեցունջի կամ Զատկի այցելութեանց նուէրներ կ'ընէր Ազգային հիւանդանոցին, վերջապէս իր անունը ամիսը քանի մը անդամ կ'երեւար «ազգային լուրեր»ու մէջ:

Եիսուն տարեկանի մօտ, ալեխառն մօրուքով բարձրահասակ մը, կամ աւելի ճիշտը, անձնաւորութիւն մըն էր Սահակ էֆ.: Ամուսնացած էր ամէն պարտաճանաչ մարդու պէս և չորս զաւակ ունէր, ինչ որ կ'ապացուցանէր ամուսնական պարտականութեանց մասին իր տածած խորին պատկառանքը: Սահակ էֆ. անուշ լեզուի, խաղաղ համոցումներու տէր, ընթացիկ բարոյականով մարդ մըն էր, որ

տարիներէ ի վեր կը տառապէր աղիքի ու լեարդի հիւանդութենէ մը, գոր բժիշկները՝ յետ երկար ու բազմակերպ դարձանումներու, ո՛չ մահացու, բայց անբուժելի հոչակած էին և խորհուրդ տուած իրեն, որ Բերայէն մեկնի և վերջնականապէս հաստատուի Մ. գիւղը, որուն օդը կրնար յամրացնել հիւանդութեան ընթացքը և մեղմել սաստկութիւնը,

Գեղացիները օրերով խօսեցան այդ տեղափոխութեան վրայ. Պարձանքով դիտել տուին իրարու գեղին առողջարար օդը, յետոյ մտածեցին թէ Սահակ էֆ. ի պէս մէկու մը ներկայութիւնը նոր զարկ մը պիտի տար իրենց դպրոցին ու եկեղեցին և թէ բախտ մըն էր, որ այդպիսի մը լեարդի հիւանդութեան մատնուած էր:

— Նախախնամութեան մատը կայ այդ լեարդին մէջ, ըսած էր դպրոցին անօրէնը, որ արդէն վարժարանի պիւտածէին վրայ կարեւոր յաւելում մը կ'երազէր, շնորհիւ նորեկ հարուստին:

Սահակ էֆ. առաջին օրէն յարգանքով մը պաշարուեցաւ ամէնուն կողմէ: Եկեղեցին, ծովեղերեայ սրճարանները կամ վողոցը, ամէն մարդ կը մրցէր աւելի մեծարանք ու պատիւ ընծայելու իրեն, որ չափազանց կը զգածուէր իր անձին նկատմամբ արտայայտուած այս համակրական ցոյցերէն:

Գեղացիներուն այս ընթացքը սակայն, ինչպէս վերը զգացուցինք, անշահախնդիր չէր ներքնապէս: Սահակ էֆ. հարստութեան տէր էր, ազգային գործերով կը հետաքըրքուէր և ագահ մէկու մը համբաւը չունէր: Իրեն արտակարդ պատիւներ ընծայելով կ'ուղէին անձնասիրութիւնը գգուել և ի նպաստ իրենց թաղին նիւթապէս օգտուիլ իրմէ: Գեղին ժամը նորոգութեան կարօտ էր, դպրոցի չէնքը խեղճ ու կրակ, գրեթէ քայլայուած վիճակի մէջ էր, գերեզմանատան պատերը փլած էին վերջի մեծ երկրաշարժէն ի վեր և Աղքատախնամին հասոյթները անբաւական կու գային օգնելու համար թաղին բոլոր կարօտեալներուն: Սահակ էֆ. քսակի սանկ լայնաբերան ու առատածեռն բացումով մը կրնար այդ ամէնքը կարդի դնել:

Սահակ էֆ. գեղը հաստատուելէն քիչ ժամանակ ետքը սկսաւ կուանել իր վրայ դրուած յոյսերը: Գեղացիները առջի բերան բաւականացեր էին տարտամ, անորոշ ակնարկութիւններ ընելով օդին մէջ, ամէնուն ուղղուած խօսքեր նետելով փորձի համար արձակուած հրթիւններու պէս: բայց յետոյ, կամաց կամաց, այդ ակնարկութիւնները աւելի ուրոշ, աւելի չետակի ուղղութիւն մը առած էին: Նոյնիսկ քանի մը անհամբերներ իրեն սա տեսակ խօսքեր կ'ուղղէին առառն վակոնին մէջ՝ չուկայ գացած ատեննին կամ կիրակի ցորեկները, պատարագէն ետքը, եկեղեցիին խորհրդարանը:

— Սահակ էֆ., ժամերնիս ալ չնորհքով նորոգութեան մը պէտք ունի, դուք ա՛լ հիմա գեղացի կը համարուիք, մեզի միջոց մը ցոյց տուէք...

— Սահակ էֆէնտի իր պարտականութիւնը ճանչցող յարդ է, ամէն բան իր կարդին, եկեղեցիին առաջ սա գերեզմանատան պատերը կան...

— Մեռեները ձգե՞նք և ողջերով զբաղինք, անանկ չէ, Սահակ էֆ... մէյ մը հարցուցած ունի՞նք թէ թաղին աղքատները ի՞նչ վիճակի մէջ մէջ են, ուտելու հաց ունի՞ն, աղքատախնամին ոնտուկը վարա կայ...

— Հապա դպրոցը... Յոյներու վարժարանին քով ախոռի տեղ անգամ չէ, իրա՞ւ որ ամօթ է մեր գեղին համար ասանկ զպրոցի չէնք մը ունենալ:

Սահակ էֆ. հաճոյակատար ականջով մը, զլխու հաւանող շարժումներով ու աչքի քաջալերիչ քթթումներով կը լուէր այս խօսքերը: Կը զգար թէ մերժողական, չոր, կը արուկ պատասխան մը վայկեանապէս պիտի ջախջախէր գեղը հաստատուած օրէն իր քիթն ի վեր երկնցուած յարգանքի ու պատիւներու խնկամանը: Երբեմն նոյնիսկ հարկ կը համարէր յուսատու, տարտամ յայտարարութեամբ մը թաղեցիներուն սիրտը վառ պահելու:

— Այո՛, իրաւունք ունիք, խորհելու է, մտածելու է աստոնց վրայ... մարդս պէտք չէ որ թերանայ իր պազային պարտականութիւններուն... մնայուն, տեւական բան

մը ընելու է... խորհելու է, մտածելու է, զլուխ գլխի տալու է... ընելու է, բարեկամներ, ընելու է, բայց տեւական, մնայուն բան մը... ատ ամէնուն վրայ ես խորհած՝ մտածած եմ լրջօրէն... ատենը գալուն երկար բարակ կը խօսինք...

Ոմանց համար այդ խօսքերը մօտաւոր ապագայի մը մէջ կատարուելիք հսկայ բարեգործութեանց աւետարեր փողահարութիւնն էր, Ուրիշներ, նուազ միամիտ, կ'ուզէին որ աւելի դրական, որոշ և շուտափոյթ արդիւնքի մը յանգէին Սահակ էֆ.ի վրայ դրուած յոյսերը և ասոր համար հանգիստ չէին ձգեր զինքը, Այս վերջիններուն ընթացքը անհարկի, անքաղաքագիտական կը նկատէր ծերունի Օհան աղան, գեղին փորձառու և խորամանկ ազգայիններին, երկար տարիներէ ի վեր ժամու բանկալին և սրճարաններուն հեղինակաւոր պատգամը որ օր մը պէտք տեսաւ ազդու յորդորական մը ուղղել անհամբերներուն:

— Մարդուն վրայ մի՛ իյնաք, աղքա՛ր, պատգամեց Օհան աղան, ձգեցէ՛ք որ քիչ մը ժամանակ անցնի, սանկ աղէկ մը տեղաւորուի, շունչ առնէ, գեղին օդէն օգտուի... ասանկով պիտի խրտչեցնէք զինքը, աչքը պիտի վախցնէք, աղքա՛ր... Սահակ էֆ. պարտաճանաչ պապա մարդ է, ես անոր տղայութիւնը գիտեմ, անոր հայրն ալ պապա մարդ էր... անոնց ամբողջ գերդաստանը կը ճանչնամ նէ... ամէնքն ալ պապա մարդիկ են անոնք, Բայց վրանին իյնալու չի զար, ձգեցէք իր հալին, նայինք ի՛նչ պիտի ընէ... մենք ջանանք միայն սիրաը չկոտրելու, իրեն նկատմամբ պակասութեան մէջ չգտնուելու, զինքը տաք պահելու եկիղեցին ու դպրոցին վրայ...

Եփուն մարդու փորձառու խօսքեր էին ասոնք, որոնք լսուեցան հաւանութեան մրմունջներով, մանաւանդ որ գեղին խոհեմ մեծամասնութիւնը բացարձակապէս համամիտ էր Օհան աղայի յայտնած գաղափարներուն, Որոշուեցաւ ամէն առթիւ ակնարկութիւններով չձանձբացնել Սահակ էֆէնտին և միւս կողմէն կրկնապատկել իրեն ընծայուած փաղաքանքները:

— Առիթ մը մտածել դանելու է փայլուն ցոյց մը ընելու համար իրեն, ըսած էր Օհան աղա խորհրդաւոր շեշտով մը՝ կրկնուած շրթունքներու վարպետորդի ծամածութեամբ մը:

Առիթը ներկայացաւ ինքնին:

Պատրիարքարանէն հասած պաշտօնական թուղթ մը տեղեկացուց Մ. գիւղի Թաղ. Խորհուրդին, որ իր պաշտօնավարութեան շրջանը լրացած էր և թէ հարկ էր նոր Թաղ. Խորհուրդի մը ընտրութեան ձեռնարկել ընդհուպ:

Երբ իրողութիւնը իմացուեցաւ, առանց նախնական խորհրդակցութեանց, առանց կարծիքի փոխանակութեան, բնազդական մղումով մը, ամէն մարդ գոչեց.

— Սահակ էֆէնտին թաղական ընտրենք!

— Ասկէ աւելի գեղեցիկ առիթ անկարելի էր որ զըսէինք, ըսաւ Օհան աղան, մէյ մը որ թաղական ընտրենք զինքը միաձայն հաւանութեամբ, ու բազմեցնենք ատենապետի աթոռին վրայ, ալ ան ատեն տեսէք Սահակ էֆէնտին:

Բայց եթէ գեղին մէջ ամէն մարդ համաձայն էր Սահակ էֆէնտին մասին, նոյն համաձայնութիւնը չկար մնացեալ ընտրելիներուն համար:

Մ. Գիւղի մէջ քուէարկուներու ամբողջ թիւը 56 էր, որոնք եօթը տարբեր և հակառակորդ կուսակցութեանց բաժնուած էին, Սահանաղրութեան հաստատումէն ի վեր, ինչպէս ամէն անգամ, ամէն կուսակցութիւն եռանդով գործի սկսաւ, Քնացած տաելութիւնները, վիրաւորուած արժանապատուութիւնները, առկախ մնացած անձնասիրական հաշիւները, մխացող պղտիկ հեռերը արթնցան, արծարծեցան, մէջտեղ ելան, Այսուհանդերձ ամէնուն ալ ցանկին գլուխը Սահակ էֆէնտին անունը կը ճառագայթէր, Սահակ էֆէնտի երբ իմացաւ իր անունին շուրջը դարձածները, անմիջապէս մարդ լրկեց և տուն հրաւիրեց եօթը կուսակցութեանց պարագուխները:

— Անունս ջնջեցէք ձեր ցանկին մէջէն, ըսաւ ամէնուն ալ վճռական շեշտով մը:

Ամէնքը ափի ի բերան մնացին և իրարու երես նայեցան:

— Բայց ներեցէք, կմկմաց Օհան աղան, արդեօք կը հաճի՞ք բացատրել թէ ինչո՞ւ կը մերժէք խորին յարգանքի այս անկեղծ արտայայտութիւնը, որ մեր գեղը կը փափաքի ընել ձեր աղնուութեան:

— Կը մերժեմ, որովհեաւ կը տեսնեմ կոր որ իմ անունս զէնք մը կ'ընէք կոր ձեր զանազան կուսակցութեանց ձեռքը, բացատրեց Սահակ էֆ. գրգռուած ձայնով մը:

Պահ մը լոեց: Ո՛չ ոք կը համարձակէր լոռւթիւնը խըզելու պատասխանատուութեան ենթարկուիլ: Ամէնքն ալ յանցաւորներու պէս գլուխնին կախ նստած էին: Օհան աղան իսկ այս անակնկալ յանկարծական պոոթկումէն շըլմորած էր:

Սահակ էֆ. ոտքի ելաւ, քանի մը անզամ սենեակին մէջ վեր վար պտտեց, յետոյ մէկէն կենալով սենեակին մէջտեղ:

— Լա՛ւ, կ'ընդունիմ, ըսաւ, բայց մէկ պայմանով...

— Հաէ՞ք ձեր պայմանը, գոչեցին պարագլուխները, յոյսի նշոյլով մը լուսապսակուած:

— Պէտք է որ, շարունակեց Սահակ էֆէնտի, բառերը հատիկ հատիկ արտասանելով, պէտք է որ թաղական Խորհուրդին մէջ ինծի ընկերակցելիք անձերը ես որոշեմ, կամ սանկ ըսեմ, պէտք է որ ես պատրաստեմ ընտրելիներուն ցանկը և եթէ այդ ցանկը ամէնքդ ալ ընդունիք, այն ատեն ես ալ կ'ընդունիմ թաղականի պաշտօնը, եթէ ոչ անկարելի է... բացարձակապէս անկարելի, ահա՛ իմ վերջնական, անդառնալի որոշումս: Գացէ՞ք, խորհրդակցեցէք իրարու հետ և եթէ այս ըսածներս գործերնուդ կու գան, եւ կէք իմաց տուէք ինծի:

Հիւրերը մեկնեցան երկու օրէն պատասխան բերելու խոստումով:

Սահակ էֆէնտիի դրած դրակոնեան պայմանը բաւոն վիճաբանութեանց տեղի տուաւ, սակայն ի վերջոյ Օհան ա-

ղայի իմաստուն, խոհական և շրջահայեաց իորհուրդները յաղթանակեցին:

— Յանուն ազգային մանկտույն և Ս. Եկեղեցւոյ պայմառութեան՝ զոհենք մեր անձնական հակառակութիւնները, ըսած էր յուղուած ձայնով, և միանանք Սահակ էֆէնտիի զրօշակին տակ: Յոյց տանք անզամ մը ես, թէ Քաջն Վարդանի, Սահակի և Մեսրոպի զաւակներն ենք և պատրաստ ենք ամէն զոհողութիւն յանձն առնել, երբ ազգին շահը և հայ երիտասարդութեան ապագան կը պահանջէ:

Եօթը կուսակցականները, որոնցմէ մին էր Օհան աղան, ներկայացան Սահակ էֆէնտիի և ըսին թէ՝ իր առաջարկը ընդունուած էր և թէ՝ իր պատրաստելիք ընտրելիներու ցանկին վրայ պիտի համաձայնէին ամէնքն ալ:

Այս պայմանը հարկեցնելով, Սահակ էֆ. վսիմ խորհուրդ մը յղացած էր: այն էր՝ իր մականին տակ բոլոր կուսակցութիւնները իրարու հետ հաշտեցնել, ամէն մէկ կուսակցութեան զլխաւորները իր ցանկին մէջ անցընելով, բայց երբ ցանկը պատրաստելու ատենը եկաւ, այն ժամանակ տեսաւ որ անյաղթելի դժուարութեան մը առջեւ կը գտնուէր: Թաղական Խորհուրդին համար եօթը անդամ հարկ էր, այսինքն իրմէ զատ պէտք էր միայն վեց հոգի, իսկ կուսակցութիւնները, ինչպէս ըսինք, եօթը հատ էին Մ. Գիւղի մէջ:

Սահակ էֆ. օրերով հնարք մը մտածեց այս կնճիռը լուծելու համար և ի վերջոյ, ճարահատեալ, որոշեց զոհել կուսակցութիւններէն մին: Քուէարկութեան նախորդ կիրակին ներկայացուց իր ցանկը: Վեց կուսակցութիւններն ալ միահամուռ իշանդավառութեամբ ընդունեցին զայն, գովելով ու փառաբանելով Սահակ էֆ.ի փափկանկատութիւնը: Այդ միանուագ գովաբանութեան մէջ, զոհուած խմբակն էր որ լոկ իր խոպոտ ու աններդաշնակ ձայնը բարձրացուց: Սահակ էֆ. վարպետութիւնն ունեցած էր ամէնէն տկար ու աննշան համարուած կուսակցութիւնը զոհելու: այս կուսակցութիւնը կը բաղկանար միմիայն չօրս կուսակցիցներէ:

Պ. Նշան՝ գեղին դպրոցէն պաշտօնանկ եղած ուսուցիչ

մը, Արթին աղա՝ թաղական խորհուրդի նախկին գանձապետ մը, գինեպան հաճի Ազրիպաս և ծերունի ձկնալաճառ մը, խամշի Համբիկ, կը ներկայացնէին այդ խմբակը, որուն պետն էր Արթին աղա, և հոգին Պ. Նշան: Հազիւթէ Սահակ Էֆ.ի ցանկին պատրաստութիւնը խմացուեցաւ գիւղին մէջ, չորսն ալ հաւաքուեցան Ազրիպասի գինետունը և հարիւրնոց քանի մը օղիի շիշերու մէջտեղ որոշեցին կատաղի պայքար մը ուղղել Սահակեան ցանկին դէմ:

Շաբաթ մը ամբողջ, մինչև քուէարկութեան վայր, կեանը, անլուր գործաւնէութեամբ դիւային իրարանցում մը ցոյց առուին չորսերնին ալ, գինեպանը իր թէզկեահին գըլուխը, ձկնավաճառը փողոցներուն մէջ, նախկին զանձապետը տուները և վարժապետը սրճարաններն, զրոսավայրերը իրենց պոռչտու քներով լեցուցին:

Իրիկունները կը ժողվուէին հաճի Ազրիպասի գինետունը, ուր այս ընտրական պայքարին առթիւ արտասովոր ոգեւորութիւն մը կը տիրէր: Հոն, գինեպանին ու խամշի Համբիկին յաճախ անտիպ ու միշտ նկարչագեղ հայնոյանքներուն մէջ, որոնք շեշտակի կ'ուղղուէին Սահակեան խմբակին հասցէին, կը լսուէր Պ. Նշանի ճաթած ձայնը, որ Սահանադրութիւն մը բռնած ձեռքը, կը ջանար գեղծումներ մատնանիշ ընել ընտրական գործողութեանց մէջ և «օրէնքի բռնաբարութիւններ, ակնյայտնի զեղծարարութիւն, ժողովրդական շահերու ոտնակոխում, բացարձակ անիրաւութիւն, ամիրայական շրջանի վերադարձ, միջնադարեան ուգի, սրբազն պարտականութիւն» ևայլնի պէս բառեր կ'որոտար ապուշ կրթած ականջներու:

Պ. Նշան իր խմբին «Փողովրդական Կուսակցութիւն» անունը տուած էր, մինչդեռ հակառակորդ Կողմը կը կոչէր «Մենծ աղաներու յետադիմական խմբակ»: Ինքն ալ իր ընտրելիներու ցանկը ունէր, որուն գլուխը կ'երեւար Արթին աղան, յետոյ ինքն, հաճի Ազրիպաս, խամշի Համբիկ, Օհան աղա, Մարգար աղա և Պ. Հարմա Արայեան: Օհան աղան կը ճանչնանք արդէն, Մարգար աղան ոսկերիչ մըն էր, իսկ Հարմա օրաթերթի օգնական խմբագիր մը որ ա-

մառները այդ գիւղը իր ազգականներէն մէկուն տունը կ'անցընէր: Ուսուցիչը այդ անուններուն, զոր գուցէ հարիւր անդամ կը կարդար գեղին բոլոր հայ բնակիչներուն, բացատրողական լրացուցիչ նախադասութիւններ աւելցուցած էր, այսպէս:

Արթին աղա, նախկին Թաղ. Խորհուրդի բազմարդիւն գանձապետ և փորձառու համարակալ:

Պ. Նշան, Ուսումն. Խորհուրդէն վկայեալ աշխարհագրութեան և պատմութեան մասնագէտ ուսուցիչ, անիրաւաբար պաշտօնանկ եղած կարգ մը անխոստավաննելի մեքենայութեանց չնորհիւ:

Հաճի Ազրիպաս, ծանօթ կապելապան և վաճառական ոգելից ըմպելեաց:

Խամշի Համբիկ, արհեստաւոր դասու ժողովրդական ներկայացուցիչ և ձկնեղինաց հայթա: Թիչ:

Օհան աղա, փորձառու ազգային գործիչ, գեղին երիցագոյն նախկին թաղականներէն մին:

Մարգար աղա, ճարտար և պատուաւոր արհեստագէտ ոսկերչաց դասուն:

Հարմա Արայեան, մեծանուն գրագէտ և հանրածանօթ խմբագիր:

Իրաւ է որ խմբագիրը, իբրև առժամեայ հիւր մը, ոչ ընարող էր ո՞չ ընտրելի, իրաւ է որ Մարգար աղա և Օհան աղա Սահակ Էֆէնտիի կուսակցութեան կը պատկանէին, սակայն Պ. Նշան իր ցանկը լեցնելու համար ստիպուած էր այդ միջոցին դիմել: Սա ծշմարիտ է որ երեքն ալ չբողոքեցին իրենց մասին ցոյց տրուած այս համակրական արտայայտութեան դէմ, միայն երբ Պ. Նշան ցանկը կարդացած էր հաճի Ազրիպասի, գինեպանը՝ տեսակ մը արժանապատութեան վիրաւորանք զգալով՝ անբացարելի վէսութեամբ մը ըսած էր ուսուցչին:

— Միւսիւ, մեր անունին քովէն սա գրաբարճա բառերը վերցուր, «Ճիխանէծի հաճի Ազրիպաս», «պալըխճի Համբիկ» զրէ մինակ, ամէն մարդ գիտէ մեզի, լաղապնուս քօլալը շապիկ մի՛ հազցներ:

Տեսնելու և լսելու էր Պ. Նշանը, երբ գինետան կամ սրճարանի մը մէջ հլու ունկնդիրներէ շրջապատռած, համբաւաւոր ցանկը ձեռքին մէջ՝ կը պաշտպանէր, իր բառերով, ժողովրդեան շահերը: Ամէն հարցապնդումի, ամէն ընդդիմախօսութեան պատասխան մը ունէր, իր ցանկը կը ջատագովէր անօրինակ եռանդով, խորին համոզումով մը բոլոր քննադատութեանց դէմ որ կ'ըլլային, նոյնիսկ քննադատութեանց դէմ, որոնք չէին ըլլար և որ սակայն կը գուշակէր թէ անոնց մտքէն կ'անցնէին:

— Այս՝ կը գոռար, ինչո՞ւ ինծի պէս ուսուցիչ մը թաղական չըլլայ, միթէ մենք նուած կարող մարդիկ ենք, քան կարդ մը տգէտ մենծ աղաները: Տեսէք Ֆրանսան, տեսէք Անգլիան, տեսէք Գերմանիան, ուսուցիչներ կան, որոնք նախարարապետ եղած են: Անգամ մը որ թաղական ըլլամ, կը տեսնէք թէ ի՞նչ վիճակի պիտի բարձրացնեմ դպրոցը:

Ու կը նետուէր մանկավարժական բացատրութիւններու մէջ, խառնիխուռն կը յիշէր Բէստալոծին, գերմանական մեթուր, զուիցերիական մանկավարժութիւնը, ժան ժագակ նուսօն, անգլիական դրութիւնը, մրէօպէլը:

— Տղուն հոգին կրթելու է, ինքնաճանաչութիւնը զարգացնելու է, գիտակից մարդիկ պէտք է պատրաստել: Տեսէ՛ք Եւրոպան, տեսէ՛ք Ամերիկան...

Եւ առանց ժամանակ ձգելու խեղճ մարդոց, որ տեսնեն Եւրոպան, տեսնեն Ամերիկան, օձիքներէն բռնածին պէս կ'առնէր կը նետէր Զինաստան:

— Զինաստանի մէջ գիտէ՞ք տղաքը ինչպէս կը կրթեն: Համբ Ագրիպասի ու Համբիկի քանտիտայութիւնն ալ պաշտպանելու համար ստիպուած էր շատ լեզու թափել, որովհետև ծաղրական դիտողութիւններ կ'ըլլային յաճախ գինեպանին ու ձկնավաճառին ընարելիութեան մասին: Պ. Նշան իր ամբողջ պատմական ու աշխարհագրական հմտութիւնը օգնութեան կը կոչէր, մեծ մեծ խօսքեր կը նետէր օդին մէջ:

— Ֆրանսական յեղափոխութիւնը կարդացէք. ամէն

մարդ հաւասար է, ժողովուրդը պէտք է իր ճակատագրին տէրը ըլլայ, ա'լ անցած են բռնակալութեան և խաւարի դարերը, արեւը ամէնուն համար կը փայլի:

Ու ահա այլանդակ, անկապակից տօղանցութեամբ մը, խեղկատակի մը ձեռք ինկած մոգական լապտերի մը մէջէն, իրար հրմշտկելով, իրարու վրայ գլտորելով, կ'անցնէին կուդովիկոս տասնըվեցերորդ, Մարա, Ռոպէսփիէո, հաւատացննութեան խարոյկները, Կալիլէոս, Ենիչէրիները, Ամիրաները, Գերագոյն ժողով, Ներսէս Պատրիարք, Կամպէթթա, Պիգմարք, ու քաղաքներ, պարանոցներ, նեղուցներ, Քամչաթքա, Բարեյուսոյ Գլուխ, Քանարեան կղզիք, Սեծ և Փոքր Պէլթ, Պոնիփաչիօ, Ալպեան լեռներ ու Վանայ լիճը...

Եւ սակայն պէտք էր խօսիլ ժամերով, ու կը սպառէր այդ ամէնքը: Պ. Նշան նորանոր օրինակներ, փաստեր, ապացոյցներ ստեղծելու պէտք կը զգար, կը միրճուէր աւելի հեռուները: Կեսարի բռնաւորութիւնը կը զատապարտէր, Բրուտոսի քաջութիւնը կը փառաբանէր, Միլթիատէսը կը ցուցնէր Մարաթոնի մէջ, Լէոնիտասը Թերմոփիլի կիրճը, յետոյ կ'անցնէր նորէն Հռոմ:

— Յուգուրթա, տեսա՞ք մի մարդը, ազնուականութիւնը ջախջախեց: Ժողովուրդին շահերը պաշտպանեց:

Շատեր ա'լ ձանձրացած այդ գիտախոիւ ու հերարձակ պերճախօսութիւններէն, զործը կարճ կապելու համար, հաւատանութեան նշաններ, համոզուելու ձեւեր ըրած էին և խոստացած իրենց քուէն Պ. Նշանի ցանկին տալու: Ուսուցիչը իր ցանկը ընդորինակած ու բաժնած էր քուէները՝ հարիւր թուղթի կտորներու վրայ, առանց ուշադրութիւն դարձնելու՝ թէ արդէն ամբողջ ընարողներու թիւը 56 հատ էր միայն:

Քուէարկութենէն երեք օր առաջ, Պ. Նշան գնաց գըտաւ օգնական խմբագիրը, Հարմա Արայեան, ինդրեց, աղաչեց որ թերթին մէջ բան մը գրէ, իրենց գեղի ընտրական պայքարին մասին: Խմբագիրը ընդդիմացաւ և կոկոզվիդ ամբարտաւանութեամբ ըստաւ:

— Մեր թերթը ատանկ ոչինչ խնդիրներով չի զբաղիր։
Բայց ուսուցչին պնդումներուն վրայ, հաւանեցաւ յիշատակութիւն մը ընել, եթէ քանի մը մէջիտ ցնծային իրեն։ Պ. նշան վազեց հաճի Ազրիպասին, ձկնալաճառին, ու Արթին աղային և երեք մէջիտ հաւաքելով՝ յանձնեց Հարժայի։ Հետեւեալ օրը՝ ուրբաթ, թերթը եկաւ, Ազգային ընտրերու մէկ անկիւնը ութը փունթօ տառերով քանի մը տող բան կար սա ձեւով։ «Մ. գիւղի մէջ յառաջիկայ կիրակի տեղի պիտի ունենայ նոր Թաղ. Խորհրդի ընտրութիւնը։ Գիւղին զարգացեալ և յառաջադէմ երիտասարդութիւնը, նախաձեռնութեամբ Պ. նշան Մակարեանի, մեծ գործունէութիւն մը ցոյց կու տայ այս առթիւ, արդիւնաւոր և գործունեայ Թաղ. Խորհրդ մը ընտրելու համար»։

Ուսուցիչը ցնծութենէն ինքնիրմէ ելած, թերթը առաւ և սկսաւ սրճարանէ սրճարան վազել։

— Կարդացէ՛ք, տեսէ՛ք ի՞նչ են գրեր մեզի համար, աֆէրիմ պէ՛…

Եւ բարձր, որոտաձայն կը կարդար ամէնուն, դէմքին վրայ յաղթական ճառագայթումով մը։

— Կեցցէ՛, կը գոչէր, տեսա՞ք մի պատուական, անկողմնակալ ճշմարտախօս թերթը, բուն ժողովրդական թերթը, ասանկ թերթ եւրոպայի մէջ աւ քիչ կը գտնուի։

Ու կը յօրդորէր ներկաները որ բաժանորդ գրուին թերթին։

— Քաջալերելու է ասանկ ժողովրդի շահերուն պաշտպան թերթերը։

Սակայն խեղճին ուրախութիւնը հազիւ 24 ժամ տեւեց։ Շաբաթ իրիկուն նոյն թերթը «հերքում» մը գրած էր ոսկիի մը փոխարէն, կամ ըստ պոլական լրագիրներու տճին, «յանուն անկողմնակալութեան»։ Այդ հերքումը, որ «իրազեկ թաղեցի յը» ստորագրութիւնը կը կրէր, հետեւեալ կերպով խմբագրուած էր։

«Զարմանոք կարդացինք ձեր պատուական թերթին երէկուան թիւին մէջ՝ մեր գեղի թաղականական ընտրութեան մասին խեղաթիւրեալ լուր մը, իբրև զարգացեալ և

յառաջադէմ երիտասարդութեան առաջնորդ ձեր յիշած պարոնը պարզապէս ապիկար վարժապետ մըն է, որ դպրոցէն ճամբուած է իր անկարողութեան և անպատշաճ վարուցը համար։ Այդ ողորմելին, զլուխը մէկ քանի իրեն պէս փողոցային սրիկաներ ժողված, կը փորձէ թաղական խորհրդի ընտրութեան առթիւ վրէժ լուծել պատուարժան թաղեցիներէն, դպրոցական պայքար մը մղելով գեղիս մեծամասնութեան ընտրելիներուն դէմ։ Անաւասիկ ճշմարտութիւնը իր բովանդակ մերկութեամբ։ Կը յուսանք որ կը հաճիք յանուն արդարութեան, սոյն երկառող հրատարակել ձեր ազգօգաւաթերթին մէջ»։

Երբ խեղճ ուսուցիչը այս տողերը կարդաց, պահ մը սահմակած մնաց. բարեբախտարար առանձին էր և ոչ ոք տեսաւ իր խղճալի վիճակը։ Երբեք հոգեկան այս աստիճան դժնդակ ցնցում մը չէր կրած կեանքին մէջ. լրագրի մէջ հրապարակաւ խայտառակուիլ, ամէնուն բերնին ծամոց ըլլալ. ի՞նչ պիտի ըսեն հիմա գեղին մէջ, երբ ամէն մարդ կարդար այդ հերքումին թունաւոր տողերը։ Խելայեղ, անիծեալ թերթը ձեռքին մէջ ամուր մը սղմած, տուն՝ իր սենեակը ապաստանեցաւ ոճրագործի մը պէս, որուն ետեւէն սոտիկաններ ինկած են. Պահ մը մտադրեց անմիջապէս շոգենաւ նստիլ ու հեռանալ գեղէն, սակայն յետոյ խորհցաւ թէ հետեւեալ առտուն իսկ քուէարկութիւնը պիտի կատարուէր, թէ շատեր խոստացած էին իր ցանկին քուէ տալու և թէ ապահով կրնար ըլլալ նպաստաւոր արդիւնքի մը մասին, պէտք էր կենալ, պէտք էր ճակատարաց երթալ վաղուան քուէարկութեան և անդամ մը որ իր ցանկը յաղթանակէր, այն ատեն ինք գիտէր ընելիքը։ Ու նստաւ գրասեղանին առջև, հերքումին պատասխան մը գրելու համար։ Մինչև առտուն մօտ գրեց, աւրեց, ընդարձակեց, քսանը ութը թերթ լցցնելսվ։ Ամբողջ իր կենսագրութիւնը ըրաւ, պատմեց մանրամասնօրէն, իր՝ իր դասատու զպրոց մտնելուն պարագաները, մէկիկ մէկիկ թուեց երկամեալ պաշտօնավարութեանը միջոցին անցած ամենափոքր ու աննշան միջադէպերը, հսկայական համեմատութիւններ

տալով անոնց. իր գպրոցէն ճամբուիլը պատմեց եղերական հովուերգութեամբ մը և վերջապէս գոհ իր գրածէն, ոգեսպառ ինկաւ անկողինին վրայ՝ քիչ մը քնանալու համար:

Հետեւեալ առառւն, կիրակի, գեղին բոլոր հայերը հաւաքուած էին եկեղեցի, ուր տեղի պիտի ունենար քուէարկութիւնը՝ ժամերգութեան աւարտումէն ետք։ Ամէնքն ալ տօնզգեստեալ, լուրջ, հանդիսական, հինաւուրց Արիսպազոսի մը անդամներուն պէս, որոնք մեծ գործ մը տեսնելու վրայ են, իրար կը բարեւէին, խուզարկու, հարցաքննիչ նայուածքներ ուղղելով մէկմէկու։ Հոն էր նաև Պ. Նշան, ակնոցը քթին, խրոխտ ու արհամարհական, որ կ'երթար կու գար ճակատամարտի մը պատրաստուող զօրապետի տենդոս շարժումներով։ Զկնալաճառ իմամջի Համբիկ խոյոր բանթալոն մը հագած, պեխերը սպառնական ու մարտահրաւէր; Լայն ու տատանատ քալուածքով մը կը չափէր ժամուն բակը։

Ատեն ատեն ծաղրածու ձայն մը կը հնչէր զասատուին ականջին։

— Բարե, Պ. Նշան, կարդացի՞ր, աս ինչե՛ր են գրեր քեզի համար...

Ու Պ. Նշան, ակնոցը քթին վրայ տեղաւորելով, դոսղացող ձայնով մը, որ ի զուր կը ջանար հանդարտ ցուցնել.

— Այո՛, հոգեվարքի վերջին հոնդիւններ. կը կարդաք պատասխանս. հանրային գործիչները ամէն ժամանակ կը հալածուին։

Բայց խօսակիցը արդէն հիացումէն անյայտ եղած էր։ Վերջապէս հասաւ քուէարկութեան ժամը։ Աւագերէցը՝ նախազան Ընտրողական ժողովին, խորհրդարանին մէջ բազմեցաւ խոչոր գրասեղանի մը քով, որուն վրայ դրուած էր քառակուսի տուփը։

Սեղանին քով շարուած էին Սահակ էֆ., Օհան աղա և գեղին միւս մեծաւորները,

Աւագերէցը ծոեցաւ դէպի Սահակ էֆէնտին.

— Սկսի՞նք քուէները ժողովիւ։

— Այո՛, պատասխանեց Սահակ էֆ. գլխի վայրահակ շարժումով մը։

2890 - 2010

Բայց ահա սպառնական ձայն մը լսուեցաւ դրան մօաէն։

— Մեր կողմէն ալ պէտք է մարդ նստի սեղանին զըլուիը։

Հաճի Ագրիպասն էր։ Առառուընէ ի վեր գրգուած տըրամադրութեամբ որթնցած, առիթ մը կը փնտուէր կոիւյարուցանելու։ Զկնալաճառը որ իր քովն էր, աւելցուց։

— Հապա՛, մենէ մարդ պէտք է հոդ, մենք ալ ազդ ենք պէ...

Եւ խամջի կամիկ իր ջղուտ ձեռքովը բռնեց առջին կեցող քուէարկու մը և մէկ կողմ հրեց։

Գինեպանն ու ձկնալաճառը մերժողական խօսքի մը, ընդդիմադրութեան մը կը սպասէին, բազուկի տրամաբանութեամբ վէճ մը ստեղծելու համար, բայց Սահակ էֆ. մէկէն ոտքի ելաւ եւ, — իրաւունք ունիք, ըստ, առաջ անցէ՛ք, հրամմեցէ՛ք, հրամմեցէ՛ք ոտք ալ, ի՞նչ ըսել է, ամէն մարդ հաւասար է, մեր մէջ եկէք իմ տեղս նստեցէք։

Յետոյ ներկաներուն գառնալով՝

— Կը խնդրեմ աեղ բացէք աղաներուն որ առաջ անցնին։

Ամէն մարդ մէկ կողմ քաշուեցաւ և ահա լայն պարապութիւն մը երեւցաւ սեղանին շուրջը, ինչ որ կրնար ասիթ մը ըլլալ մեծկակ վէճի մը, բայց Աւագերէցին հրաւէը այդ պատրանքն ալ ցնդեցուց։

— Անցէ՛ք, առաջ անցէ՛ք, կ'ըսէին ամէն կողմէ։

— Զիգա՞ս պէ՛, գոչեց վերջապէս զինեպանը ձկնալաճառին ձեռքէն քաշելով։

— Բայց միւսը, վէս ու արժանաւոր, ձեռքը ուժով մը ետ առնելով։

— Զէ՛, ձգէ՛, ես չեմ գար, դուն գնա՛։

Հաճի Ագրիպաս նեղուած, դժոհն, քիչ մըն ալ չփոթած, զանդաղ քայլերով առաջ անցաւ և եկաւ բազմեցաւ Աւագերէցին քով։ Ուշադրութեամբ դիմեց քուէտուիը, սեղանին տակ նայեցաւ կամկածու աչքով, թաշկինակովը

քրտինքը սրբեց, օ՛ֆ մը արձակեց, յետոյ մէկէն ոտքի եւլած.

— Միւսի՛ւ, գոչեց խօսքը պ. Նշանին ուղղելով, դուն եկուր նստէ, ես կ'երթամ կոր... իմ խելքս չի հասնիր... ես ասանկ օքքապազութիւններէն չեմ հասկնար...

Վերջին խօսքերը արտասանած միջցին աչքերը ժուռ ածեց սրահին բոլորափը, կը սպասէր որ մէկը կծու պատասխան մը տար իրեն, սակայն, աւա՛ղ, ո՛չ ոք ձայն բարձրացուց:

— Զգաս պէ՛, խուլ ես ի՞նչ ես, գոռաց զինեպանը պ. Նշանին, բազուկը օդին մէջ երկարելով:

— Եկէ՛ք, դուք ալ եկէ՛ք, միւսի Նշան, ըսաւ աւագերէցը հայրական փափկութեամբ:

Ուսուցիչը ակնոցը տեղաւորեց քթին վրայ և առաջ անցաւ:

Քանի կոխի առիթները կը վիճէին՝ այնքան կ'աւելնար գինեպանին բարկութիւնը: Երբ պ. Նշան հասաւ սեղանին քով, հաճի Ագրիպաս բուռն շարժումով մը պատրաստուեցաւ դէպի դուռը երթալու և պոռաց տաճկերէն լեզուով.

— Խերն անիծեմ քուէարկութեան ալ, Թաղական Խորհուրդին ալ, ինծի ինչ պէ՛, ես իմ գործս նայիմ, առտուընէ ի վեր խանութս ձգեր, ապուշի պէս ժամուն բակը ատեն կ'անցընեմ կոր կիրակի օրով, թաղական պիտի ընտրեն եղեր... թաղականը իմ փորս կը կշտացնէ... անոնք մինակ իրենց փորը կշտացնելու համար թաղական կ'ըլլան. ազգին փարաները, ժամուն եկամուտները ուտելու համար, թո՛ղ ուտեն, անուշ ըլլայ... խերն անիծեմ ամէնուն ալ:

Քանի մը քայլ առաւ դէպի դուռը, միշտ պատասխանի մը, յարձակումի մը կը սպասէր: Ո՛չ ոք ձայն հանեց:

Կեցաւ սենեակին մէջտեղը, գրպանը խառնելով թղթի կտոր մը դուրս հանեց: Իր քուէն էր, իր քուէն զոր այնքան հատիկ հատիկ դիւրընթեռնելի կերպով գեղագրած էր դաստուն:

— Քուէ ալ պիտի չտամ, ի՞նչ պիտի ընէք նայի՛մ... չպիտի տամ վէսէլամ... չպիտի տամ պէ՛...

Եւ թուղթը կտոր կտոր ընելով գետին նետեց: Ագրիպաս կը կարծէր որ ստիպուած էր քուէ տալու և թէ իր այս ըմբոստացումը միջադէպ մը պիտի յարուցանէր անպատճառ:

— Օղլում, ըսաւ աւագերէցը հանդարտութեամբ, մենք բոնի քուէ չենք ուզեր քենէ, եթէ կը բարեհաճիս՝ կուտաս, եթէ ո՛չ, մենք ոեւէ կերպով իրաւունք չունինք քեզ բոնադատելու:

— Տէր պապա՛, պոռաց գինեպանը, որ բան մը չէր հասկցած քահանային խօսքերէն, ես քառասուն տարուան մէխանէճի հաճի Ագրիպասն եմ, աչքս աղէկ նայէ, ինծի օյին չ'ըլլար... աս տեղ ինչ կը դառնայ կոր նէ ես աղէկ պիտեմ... ինծի՞ ալ պէ՛, ինծի՞ ալ լոլո...

Վերջապէս դուրս ելաւ խորհրդարանէն: Հազիւ թէ մեկնած էր, ամէնքը մէկէն յարձակեցան խեղճ պ. Նշանին վրայ:

— Յանցանքը անորը չէ, ըսաւ Սահակ էֆէնտի, այլ ինքինքնին ուսումնականի տեղ զնող կարգ մը զէվզէկներուն, որ ասանկ մարդոց երես կու տան:

— Զե՞ս տմշնար ծօ՛, խայտառակ, գոչեց Օհան աղադասառին երեսն ի վեր:

— Դուրս հանեցէ՛ք այդ խըմպըլը, կը հրամայէր մէկըն ալ անդիէն:

— Երէկուան լրագիրը աղուոր լուացեր էր քեզի, բայց նորէն քիչ է, կ'ըսէր ուրիշ մը:

Ուսուցիչը այդ տեղատարափ հարուածներէն շփոթած, շլմորած, չէր գիտեր որո՞ւ պատասխանէր: Դողահար, կէս մը ոտքի ելած, երկու ձեռքերը սեղանին վրայ:

— Բայց կ'աղաչեմ, կը կմկմար, արժանապատուութիւնները յարգենք... իրաւունք չունիք, կը բողքեմ... սխալ հասկացողութիւն կայ... թեթեօրէն պէտք չէ դատել...

— Ինչ որ է, անուշի կապեց աւագերէցը, փակենք

այս անհարկի միջադէպը և գործի սկսինք, արդէն ժամանակը բաւական անցած է:

Քուէները սկսան ժողուցուիլ. պ. Նշան կամաց մը ձգեց սեղանը գնաց դրան մօտ, ձկնալվաճառին ետին կը կուցաւ, սպասելով քուէարկութեան արդիւնքին, զոր միշտ իրեն նպաստաւոր կը նկատէր վարժապետական միամտութեամբ մը.

Քուէնամարի գործողութիւնը հազիւ ժամ մը տեսեց և աւագերէցը կարդաց արդիւնքը: Քուէարկութեան մասնակցած էին 55 հոգի, որոնցմէ 52ը իրենց քուէն Սահակ էֆէնտիի ցանկին տուած էին և երեքը ընդդիմադիր կուսակցութեան: Ուսուցիչը, որ ականջ կտրած դրան մօտ կը լըսէր նախագահին խօսքերը.

— Մատնութիւն, պոռաց և եկեղեցին դուրս նետուցաւ:

— գոչեց ձկնավաճառը:

Բ.

Յաջ. Դ կիրակին նորընտիր թաղականները իրենց անդրանիկ նիստը ըրին դիւանը կազմելու համար: Միաձայնութեամբ ատենապետ հոչակուեցաւ Սահակ էֆէնտի: Օհան աղա ժողովէն ելլելով եկած էր ծովեղերեայ մեծ զբոսարանը, ուր հաւաքուած էին գրեթէ գեղին բոլոր հայերը: Ծերունի նորընտիր թաղականը մօտեցաւ բոլոր սեղաններուն և սրտազեղ ուրախութեամբ աւետեց ժողովին արդիւնքը.

— Սահակ էֆէնտին ատենապետ ըրինք միաձայն հաւանութեամբ: Ալ հիմա նայեցէք ի՞նչ պիտի ըլլայ մեր գեղը:

Թերթերն ալ մեծամեծ գովեստներով ծանուցած էին այդ ընտրութիւնը: Գոված էին այն միաձայնութիւնը և օրինապահութիւնը, որով կատարուած էր քուէարկութիւնը և Սահակ էֆ. ի ազգային գործերու մէջ ունեցած փորձառութիւնը շեշտելով՝ յայս յայտնած էին թէ մօտ ժամանակէն Մ. գիւղի կրթական և բարեգերծական հաստատու-

թիւնները հսկայական յառաջդիմութիւններ պիտի ընէին, շնորհիւ այդ բարձր անձնաւորութեան, որուն ներկայութիւնը ճշմարիտ շնորհք մը և երկնային բարիք մըն էր զեղին համար:

Անցան օրեր, շաբաթներ ու ամիսներ, Սահակ էֆ. խզմտօրէն կը կատարէր իր ատենապետութեան պաշտօնը. միշտ ներկայ կը գտնուէր նիստերուն, իր խորհուրդներն ու խրատները կը շոայէր ամէնուն, սակայն քսակէն փարա մը առւած չունէր:

Գեղացիներուն համբերութիւնը կը սպառէր: Անհամ ակնարկութիւններ, կծու զիտողսւթիւններ սկսան ծայր տալ:

Ընդդիմադիր կուսակցութիւնը, որ ընտրութեան ջախջախիչ արդիւնքէն ձայնը քաշած, պապանձած էր, գլուխ վերցուց:

Պ. Նշան հեղնական դիրք մը տուաւ, լսած էր որ ծաղը կը սպաննէ և այդ զէնքով ոճիրներ կ'երկնէր:

— Սահակ էֆ. Ի՞նչ նոր մեծագործութիւն ըրաւ այս շաբթու, կը հարցնէր Օհան աղային կամ ուրիշ թաղականներուն:

Երբ Աղքատախնամին գանձանակը կը բնրէին Հաճի Աղքիպասի, կը մերժէր իր նուէրը:

— Հիմա մեր հինգ տասը զրուցին պէտք չունիք. Սահակ էֆէնտիին պէս մարդ կայ մէջերնիդ:

Ու ձկնավաճառը անդիէն.

— Քասային բալիքը ձեզի է տուեր . . .

— Վախնամ քասան այնչափ բացած չունի, որ բալիքը փալանմիշ է եղեր, կը ծաղրաբանէր ուրիշ մը:

— Բալլիք կ'ուզէք նէ իմ քովս հատ մը կայ, կը յաւելուր անպատկառ Խամզի Համբիկ:

Եւ շատեր, որոնք Սահակ էֆ. ի տուած էին իրենց քուէն, արդարացի կը գտնէին այդ ծաղրաբանութիւնները:

Ատենապետը կամաց կամաց զգաց իր համբաւին խախտիլը:

Այս միջոցներուն՝ վրայ հասաւ Մանկապարտէզի տա-

բեկան հանդէսը: Գեղին դպրոցի Հօգաբարձութիւնը, «Եռանդուն և անձնուէր երիտասարդներէ կազմուած», ուղեց այս անգամ արտասովոր փայլով մը կատարել այս հանդէսը: Դպրոցին պարտէզը մեծ վրան մը կանգնուեցաւ, ծաղիկներ բերուեցան ամէն կողմէ և աթոռներ՝ ամէն տունէ: Սահակ էֆ.ի անդրանիկ աղջիկը, օր. Զարուհի, իր դաշնակը անձնուիրաբար նուիրեց երեք ժամուան համար և յանձն առաւ քանի մը կտոր նոււագել հանդէսին ատեն:

Յուլիսի տաք կիրակի մը, գեղին բոլոր հայ ընտանիքները, իրենց ծառաներով, սպասուհիներով ու խոնարարներով լեցուեցան պարտէզը, իրարու վրայ դիզուած, խընդուած: Լայն թիկնաթոռի մը վրայ բազմած էր Սահակ էֆ.՝ հանդէսին նախագահը, իր շուրջը ունենալով թաղականները և ուրիշ ժօտակայ գիւղերէ հիւրեր և մամլոյ ներկայացուցիչներ: Հեռուն՝ հանդիսականներու առաջին շարքին մէջ կ'երեւար պ. Նշան՝ հեգնող, դատափետիչ ակնոցը քթին վրայ:

— Ի՞նչ ողորմելի կազմակերպութիւն, ի՞նչ անկանոն կարգապահութիւն, կ'ըսէր քոլիններուն. աթոռները փոխանակ ասանկ շարելու, լաւագոյն չէ՞ր ըլլար դէպի երկայնքին դնել: Դաշնակը տեսէ՞ք ի՞նչ աննպաստ պայմաններու մէջ տեղաւորուած է. ծաղիկները շատ անճաշակ կերպով դրուած են. կիներուն յատկացուած մասը պէտք էր աջ կողմը ըլլար. բայց ո՞վ ուշադրութիւն պիտի ընէ ասանկ բաններու...

Ցետոյ կը քննադատէր այն խաղալիքները, որոնք սահմանուած էին իրը նուէր տղոց արուելու:

— Այս տեսակ խաղալիքներէ ի՞նչ շահ, ի՞նչ օգուտ կընայ քաղել տղան... Տղուն ձեռքը այնպիսի խաղալիքներ տալու է, որ միտքը մշակէ, իմացականութիւնը զարգացնէ, բարոյականը զօրացնէ, հոգին կրթէ, հետաքրքրութիւնը սրէ, դարուս ողույն համեմատ ուղղութիւն մը տայ իրեն, վերջապէս ինքնաճանաչ ու պատուաւար քաղաքացիներ պատրաստէ... Մա՛րդ պատրաստեցէք, մա՛րդ, և ոչ թէ մարդամեքենաներ:

Մանկական պարեր, մանկական երգեր, մանկական մարմամարզներ կատարուեցան: Ամէնէն ետքը, 5-6 տարեկան երեք երախաներ զաւեշտ մը ներկայացուցին խիստ յաջող կերպով: Մին բժիշկ եղած էր, միւսը՝ հիւանդ և երրորդը՝ սպասաւոր: Հանդիսականները կուշտ ու կուռ խընդացին մանուկներուն լուրջ ու հանդիսական ձեւերուն վրայ և ընդհանուր ծափահարութիւն մը ողջունեց խաղին աւարտումը: Երկու պարտիզպանուհի օրիորդներուն յաղթանակը եղաւ այս: Սահակ էֆ. ինքն էր ծափահարութեանց նշանը տուող և ափէրիմներ, ապրիսներ կ'ընկերանային իր ծափերուն: Հանդէսին փակումէն առաջ, վարժուհիներէն մին տեղեկագիր մը կարդաց և երբ լմնալէն ետքը ամէն մարդ կը պատրաստուէր մեկնելու, Սահակ էֆ. ոտքի ելաւ խօսելու համար: Ամէնքն ալ իրենց մեկնումի շարժումին մէջ քարացած մնացին:

— Այսօրուան հանդէսը զիս չափէն աւելի գոհ ձգեց, ըստ բարձր, ինքնավստան ձայնով մը: Ապրին գեղին ուսումնական երիտասարդները, որոնք այսչափ հոգ կը տանին մեր պզափիկ տղոց կրթութեանը համար: Բայց միայն նախանական պարզ կրթութիւն մը տալը բաւական չէ: Ժամանակները փոխուած են: Հիմա մարդս ապրելու համար գիտութիւններ, լեզուներ, արհեստներ սորվելու պէտք ունի: Կարողութիւն ունեցողներուն պարտականութիւնն է ասոնց վրայ մտածել (Բուռն ծափահարութիւններ): Պէտք է մնան այսուն, տեւական բան մը ընել: Ազգին զաւակները մեր ամէնուս ալ զաւակներն են....

— Կեցցէ՛, կեցցէ՛ Սահակ էֆէնտին....

— Ամէն հարուստ իր ձեռքէն եկածը պէտք է ընէ ազգին կարօտ պատանիներուն կրթութեանը համար: Անտարբերութիւնը մեղք է, ամօթ է: Ես իմ կարողութեանս չափով կ'ուզեմ օրինակ տալ ուրիշներուն և այսօրուընէ կը յայտարարեմ որ այս պզափիկներէն երեք հատը... Խաղը ներկայացնողները, իմ պաշտպանութեանս տակ պիտի առնեմ....

— Կեցցէ՛, կեցցէ՛, կեցցէ՛...

— Այո՛, իմ պաշտպանութեանս տակ պիտի առնեմ...
երբոր քսան տարին լրացնեն, ու այն տաեն իմ քսակէս
եւ ըսպա պիտի զրկեմ զիրենք, որ արհեստ մը, գիտութիւն
մը սորվին իրենց ճաշակին համեմատ:

— Կեցցէ՛, կեցցէ՛, կեցցէ՛...

— Հետեւաբար կը ինդրեմ, որ Պատուարժան Հոգա-
բարձութիւնը այդ երեք տղոց անունը, մականունը, ծննդ-
եան թուականը, ծնողացը անունը և արհեստը մանրամաս-
նօրէն թուղթի մը վրայ նշանակելով ինծի հաղորդէ:

Սահակ էֆէնտի նստաւ թիկնաթոռինմէջ:

Իննդավառութիւնը աննկարագրելի էր, կեցցէներու
անվիրչանալի որոտում մը կը դրդէր օդը: Շատ մը թեւեր
օդին մէջ կը տատանէին: Անոնք որ ետև մնացեր էին ու
չէին կրնար տեսնել Սահակ էֆէնտին, յառաջ կը խուժէին
մոլեգին: Ընդհանուր իրարանցում, տակնուվրայութիւն,
վայնասուն մը կը տիրէր ամէն կողմ: Տղաք սկսան լալ և
քանի մը կիներ մարեցան...

— Զո՞ւր, զո՞ւր, կը պոռային չորս դիէն:

Պ. Նշան աթոռի մը վրայ ելած՝

— Հանդարտութիւն, հանդարտութիւն, կը հրամայէր:

Վերջապէս, այս ընդհանուր ոգեւորութեան մէջ, պար-
տէզը սկսաւ պարպութիւն:

Իրիկուան, ամէնուն խօսակցութեան նիւթը Սահակ
էֆէնտիի մեծագործութիւնն էր:

Օհան աղան յաղթական «տեսաք մի»ներ կ'արձակէր
թերահաւատներուն երեսին, որոնք ամչկոտ պապանձումի
մը մատնուած էին:

Միայն խմբագիրը, Հարմա Արայեան, սկեստական ժը-
պիտով մը կ'ըսէր.

— Կարծեմ լսւագոյն պիտի ըլլար այս կեցցէները պա-
հել տասնընդինք տարի ետքի... երբ երեք երախաները մնծ-
ցած՝ շոգենաւ նստին Եւրապա երթալու համար: Մենք հի-
մա աղօթենք որ բարերարին լեարդի հիւանդութիւնը տա-
կաւին քսան տարի փորձանք մը չհանէ:

Այս արդարացի խորհրդածութիւնը սակայն արգելք

մը չեղաւ, որպէսզի հետեւեալ օրը թերթին մէջ «Օրինակե-
լի Բարերարութիւն» խորագրով շոնդալից յօդուած մը չը-
գրէր, որուն մէջ եօթներորդ երկինքը բարձրացուցած էր
մեր հարուստ վաճառականը:

Միւս թերթերն ալ մեծամեծ գովեստներով խօսեցան
այս մեծ բարերարութեան վրայ, Գաղազ Ամիրան ու Սա-
նասարեանը յիշեցին այս առթիւ, Աբրահամ Այվազեան՝ Կա-
չուտէրեան գերգաստանին կենսագրութիւնը ըրաւ և Պատ-
րիարքը օրհնութեան կոնդակ մը դրկեց Սահակ էֆէնտիին:

Այս դէպքէն ամիս մը հաք, առանու մը, Խորհրդարա-
նին մէջ. Օհան աղա յայտնեց Սահակ էֆ.ի թէ գեղացի
աղքատ աղջիկ մը կար, որ մօսերս պիտի ամուսնանար
պարկեցած երիտասարդի մը հետ, բայց որեւէ միջոց չունէր
նոյնիսկ անհրաժեշտ օժիտ մը պատրաստելու համար և թէ
ինք ու քանի մը բարեկամներ որոշած էին հանգանակու-
թիւն մը ընել այս առթիւ, և հրաւիրեց Սահակ էֆէնտին,
որ մասնակցէր այս բարի գործին:

— Դուք բանի մը մի՛ խառնուիք, ըստ Սահակ է-
ֆէնտի, ե՛ս մինակս այս աղջկան ամբողջ օժիտը պիտի հո-
գամ:

Օհան աղա այս յանկարծական պատասխանին վրայ
ափ ի բերան մնացած, չնորհակալութեան և օրհնութեան
քանի մը խօսքեր թոթովեց և մեկնեցաւ:

Սահակ էֆէնտի, որ մանկապարտէզի երեք երախա-
ներու առթիւ իրեն ուղղուած անհատական և հրապարակա-
յին գովեստաներէն գինովցած էր, ա՛լ կը փափաքէր բարե-
րարի հաստատ համբաւ մը շինել, տեւական՝ մնայուն բան
մը, և իր պաշտօնակիցներուն առաջարկը անմիջապէս իրեն
ընդնշմարել տուաւ որ պատուական առիթ մըն էր այդ չը-
քաւոր աղջկան օժիտը՝ նոր շպարով մը փայլեցնելու հա-
մար իր անունը:

Հետեւեալ օրն իսկ Սահակ էֆ. ներկայացաւ իր շու-
կայի բարեկամներուն, մանիփաքթուրայի վաճառականներ
կամ խանութպաններ:

— Սըտեղէն թօփ մը ձերմակ խասա տո՛ւր, ըստ մէկուն:

— Սահակ էֆէնտի, ձեզի՞ համար է:

— Զէ՛, գեղերնիս աղքատ աղջիկ մը կայ հարս կ'ընենք կոր տէ... թօփ մը խասան ալ թող ձեր նուէրը ըլլայ, դուք ասանկ բարիքներ կը սիրէք:

Ու խասան ծառային յանձնելով մտաւ ուրիշ խանութ մը:

— Բարե՛ւ, Մարկոս էֆէնտի, այսօր մուրացկանութեան ելած եմ...

— Ի՞նչ կայ որ...

— Ճանըմ, գեղերնիս աղքատ աղջիկ մը կայ, որ հարս պիտի ըլլայ, օժիտ շինելու կարողութիւն չունի, եւլան ինծի եկան, էհ իշտէ. ձեռքէս եկածը կ'ընեմ կոր... դուն ալ հարկաւ փիստանցու մը չես մերմեր:

Մարկոս էփ. դժգոհութիւնը ծածկելով, հրաման կ'ընէ որ փիստանցու մը կտրեն:

Այս կերպով յինչեւ իրիկուն, մեր բարերարը հարսընցուին բոլոր պէտք եղած օժիտը կը հոգայ առանց քսակին բերանը բանալու:

Իր շուկայի ծանօթները, որոնք գիտէին ամիս մը առաջ Սահակ էֆէնտիի բարերարական մեծ առաջարկը, կը պատկառէին և չէին ուզեր փոքրիկ բանի մը համար զինքը վշտացնել՝ մերմելով իր ըստածը. ասկէ զատ, Սահակ էֆէնտի հարուստ էր և հարուստ մարդ մը արդէն միշտ պատկառելի է և անդիմաղբելի:

Հարստութիւնը ինքնին ձգողական բան մը ունի. նոյն իսկ անոնք որ այսինչ կամ այնինչ հարուստէն բան մը չեն սպասեր, բան մը չեն յուսար կամ յուսալու պէտք չունին, ամէն զո՞ղութիւն յանձն կ'առնեն հեռուէն կամ մօտէն յարաբերութեան մտնելու համար:

— Հարուստ մարդէն միշտ օգուտ կրնայ ծագիլ, բայց ո՛չ վնաս, կը տրամաբանեն, ասկէ զատ, ո՞վ գիտէ, կարելի է որ մը գլուխնիս ցաւի նէ՛ իրեն դիմելու կ'ըլլանք:

Ու յետոյ փողոցէն անցած ատենդ բարեւելը կամ հետը

խօսիլը մէկու մը, որուն արկղին մէջ գուցէ հարիւր հազար ոսկի կայ, շատ աւելի խորունկ և այլապէս հմայիչ է, քան թէ վարժապետի մը հետ խօսիլը, կամ տիրացու մը բարեւելը:

Դրամը ոչ միայն նիւթապէս տոկոսաբեր է, այլ նոյն իսկ բարոյապէս: Հարուստ մը առանց ուեւէ զոհողութեան, առանց ուեւէ ջանքի, միմիայն իր դրամին շնորհիւ և անոր քանակութեան համեմատ կը բարձրանայ, կը պարկեշտանայ, կը պատուաւորուի, կ'ազնուաչքանայ, կ'իմաստունայ:

Ընդհանրապէս կ'ըսենք հարուստի մը համար.

— Դրամը քովէն առնես նէ ապուշ ապուշ աւանակին մէկն է:

Բայց չենք ըսեր.

— Ապուշ աւանակին մէկն է, որ դրամ ունի:

ինչ որ ցոյց կու տայ թէ այնքան ատեն որ դրամ ունի, ապուշ աւանակ մը չէ և թէ դրամը քովէն երթալէն ետքն է որ պիտի ապուշնայ:

Սողոմոն, որ իմաստուն կոչուած է իր հարստութեանը համար կ'ըսէ. «Իմաստութիւնը արծաթի պէս փնտոեն ու ծածուկ գանձերու պէս խնդրես», ինչ որ իմաստութեան և դրամին միշտ եղած նոյնութիւնը կը հաստատէ:

Այսպէս ուրեմն Սահակ էֆէնտի, շնորհիւ իդ հարստութեան առթած պատկառանքին, կրցաւ խեղճ աղջկան ամբողջ օժիտը պատրաստել:

Ասիկա գեղին մէջ նորանոր գովարանութեանց և օրհնէնքներու պատճառ եղաւ: Ամէնէն յամառ սկեպտականն ներն իսկ ստիպուցան գլուխ ծռել այդ տեսանելի և շոշափելի բարերարութեան առջև: Թերթերը յիշտավկեցին օժիտի պատմութիւնը «Մ. գիւղի բարերարը» տիտղոսին տակ և այդ մակղիրը մնաց Սահակ էփ. ի վրայ: Գեղին մէջ շատեր ա՛լ Սահակ էփ. չէին ըսեր զինքը յիշած ատեննին, այլ «մեր գիւղին բարերարը»:

Եւ Սահակ էփ. կանգ չառաւ այս գեղեցիկ ճամբուն

մէջ, ամէն օր նորանոր առիթներ գտաւ, նորանոր միջոցներ հնարեց բարերարելու:

Իր փոքրիկ տղուն՝ վահանիկին փոքրիկ գանձանակ մը գնեց, որուն մէջ ամէն այցելու սահպուած էր նուէր մը ձգել: Հաւաքուած դրամով գերեզմանատան պատերը պիտի նորոգուէին:

Տղան, հօրամոյն զաւակ, միայն տան այցելուները տուգանքի ենթարկելով չգոնացաւ. կիրակի առտուները, գանձանակը ճեռքը, կ'երթար եկեղեցիին շրջափակը իր սկսակ բարերարի պաշտօնը կատարելու. իրիկունները կըրկին գանձանակովը կը շրջէր ծովեղերեայ զրօսատեղիները: Գեղին մէջ անունի տօնախմբութիւն, հարսնիք, կնունք կամ նշանտուք չէր կատարուեր առանց այդ ինքնակոչ հիւրին՝ գանձանակին՝ ներկայութեանը:

Ա՛լ գեղացիներուն համար մղձաւանջ մը դարձած էր վահանիկն ու իր գանձանակը: Այսուհանդերձ իրենց նըւէրները չէին համարձակեր մերժել իրեն, որովհեաւ իրենց «բարերար»ին տղան էր:

Մինչ գանձանակը կը շարունակէր իր անվերջանալի շրջագայութիւնը, դպրոցին չէնքը հետզհետէ կը սպառնար վերջնական ու աղետալի քայլայումի մը: Ամէն փոթորիկ, անձրև կամ հով նոր աւերում մը կը գործէր: Ծնողքները կը վախնային տղաքը դպրոց դրկելու և հոգաբարձութիւնը կը խորհէր եկեղեցիին վերնատունը դասարանի վերածել: Գեղին մէջ դպրոցի չէնքին վիճակը օրուան խօսակցութեան նիւթն էր և ամէն մարդ ակնդէտ կը սպասէր որ Սահակ էֆ, «բան մը ընէ»:

Կիրակի մը, ժամերգութենէն ետքը, թաղականները իրենց ատենապետին՝ Սահակ էֆ. ի հետ զացին քննելու դպրոցը, ընկերակցութեամբ ճարտարապետ Մկրտիչ աղայի, Շէնքին հիմերը, պատերը, առաստաղը և գետնատախակները մանրամասնորէն զննուեցան: Վերջապէս Մկրտիչ աղա վճիռը արձակեց.

— Այս դպրոցը անմիջապէս գոցելու է, որովհեաւ մըզ կեանքը ամէն ժամ վտանգի մէջ է,

Հետեւեալ օրը դպրոցը փակուած էր և առժամեայ կերպով»: Գեղին մէջ յուզումը սաստկացաւ:

— Ի՞նչ պիտի ընէ Սահակ էֆէնտին:

— Ինչու բան մը չ'ըներ կոր Սահակ էֆէնտին:

Կը հարցնէին իրարու գեղացիները, և պ. նշան, միշտ ընդդիմադիր կուսակցութեան պետք, հեգնական յաղթանակով մը կը պատզամէր.

— Սահակ էֆ. բան մը ընելիք չունի, տղաքն ալ այսպէս փողոցները պիտի մնան... ևս արդէն առաջին օրէն ըսած եմ ու նորէն ճակատաբաց կը կրկնեմ թէ՝ ազգ մը Սահակ էֆէնտիներով չի կառավարուիր: Ժողովրդեան ամէն խաւերէն ու տարրերէն բիող անդամները պէտք են թաղական խորհուրդի մը գլուխը, բայց արդէն մա՛րդ չունիք, մա՛րդ, ճշմարիտ վարչագէտները, պետական անձերը կը պակսին մէջ, թէիէրի կամ կլատութոնի պէս մարդիկ, զոր օրինակ...

Դասատուին յաղթութիւնը սակայն կարճատե եղաւ: Յաջորդ կիրակի Սահակ էֆ. թաղակական խորհուրդին մէջ ծանուց՝ ամենապարզ բանի մը պէս թէ՝ որոշած է ինք ամբողջովին վերաշնել դպրոցը:

Լուրը անմիջապէս տարածուեցաւ ամէն կողմ:

— Տեսա՞ք մի, կը գոչէր Օհան աղա ուրախութենէն խելայեղ, տեսա՞ք մի, Սահակ էֆ. ի՞նչ մարդ է... արձան կանգնելու է, արձա՞ն, ասանկ բարերարներուն:

Իրիկունը երբ Սահակ էֆ. ընտանեօք եկաւ ծովերեւայ սրճարանը, ամէնը յարգանքով ոտքի ելան ու եկան ձեռքը թօթվել ու իրեւ գեղացի իրենց երախտագիտութիւնը յայտնել:

— Կ'աղաչեմ, մի' չափազանցէք, կ'ըսէր ամէնուն Սահակ էֆ. համեստունակ դէմքով մը, եղածը մեծ բան մը չէ, ևս պարզապէս իմ պարտականութիւնս կատարած պիտի ըլլում:

Նոյնիսկ պ. նշան, գործին մեծութենէն շլացած, եւ կաւ իր կարգին Սահակ էֆ. ի ձեռքը սեղմել:

— Սահակ էֆէնտի, ըսաւ, թէև կարծիքներու, զաղափարներու և սլզբունքներու մեծ տարբերութիւն մը մեզ իրարմէ կը բաժնէ, բայց ներեցէք որ այս հանդիսական ժաման մոռնամ ձեր մէջ եղող թաղական խորհուրդի ատենապետը և հոն տեսնեմ միայն «Ազգային Բարերար»ը...

Հազիւ թէ վերջին բառերը արտասանած էր, ահա Սահակ էֆէնտի շուրջը գտնուողները «կեցցէ՝ ազգային բարերար» աղաղակը բարձրացուցին և սեղանէ սեղան «կեցցէ՝ ազգային բարերար» շրջեցաւ ընդհանուր յուղումի մը մէջ։ Այս խանդավառութենէն վահանկի օգուտ քաղեց իր անբաժանելի գանձանակը մէջտեղ հանելով։ ալ ո՞վ կրնար միրժել իր նոռէրը,

— Սդէրիմ Վահանիկ, տեսէ՛ք, հիմակուընէ բարիք ընել կ'ուզէ կոր։

— Անանկ հօր զաւակն ալ հարկաւ այսպէս կ'ըլլայ։

— Հիմա ասանկ է նէ՛, մեծնայ նէ ինչ՛ը պիտի չընէ։

— Ապրիս, կեցցե՛ս։

Եւ դահեկանները կ'իյնային ու կ'իյնային զանձանակին մէջ։ Երբեք այդ օրուան պէս հասոյթ մը չէր ունեցած պզակ հանգանակիչը։

Հետեւեալ օրը, թերթերը լիցուած էին Սահակ էֆ.ի նոր բարերարութեան ներբողներովը։ «Մ. գեղի բարերար» ա՛լ այս անգամ «Ազգային բարերար» կը հռչակուէր, արժանի յաջորդը Պէզճեաններու և Սանասարեաններու։ Հստթերթերու գրածին, այդ բարերարութեան արժէքը կը կըրկնապատկուէր՝ այնքան համեստ ու այնքան ինքնաբեր եղանակով մը ի գործ դրուած ըլլալուն համար։

Անցան քանի մը շաբաթներ։ Վարժարանին աղաքը կը շարունակէին պիլիս խաղալ փողոցներուն մէջ և գեղացիները չէին դադրեր գովարաննելէ Սահակ էֆէնտին։

Վարժարանին վերաշնուրեան խնդիրը գեղին ամբողջ հայ բնակչութիւնը կը զբաղեցնէր, այս առթիւ ամէն մարդքի մը ճարտարապետ եղած էր և իրեն յատուկ յատակագիծը ունէր կառուցանելի շէնքին համար։

— Հիմերը չորս մէթր խորունկ փորելու է, կը խրատէր Օհան աղան այստեղի հողը այնպէս կը վերցնէ։

Հաճի Ազրիպաս աղա կ'ուզէր որ վարժարանին ներքսայարկը մեծկակ գինետուն մը շինուի և կը խոստանար հինգ տարի վարձելու համար պայմանագրութիւն կնքել։

— Պատուհանները լայն և ձեղունը կարելի եղածին չափ բարձր, կը հրամայէր պ. Նշան։ Պէտք է առողջապահական օրէնքներուն համեմատ շինուի նոր շէնքը, արդի մանկավարժական առողջապահութիւնը կը պահանջէ, որ դասարանները առնուազն 12 մէթր երկայնութիւն և 8 մէթր լայնութիւն ունենան, գործարանները շէնքէն դուրս, պարտէզին անկիւնը պէտք է շինել, մասնաւոր խնամք տանելու է մարմնամարզի յատկացուած մասին։ յետոյ բաղնիք մը անհրաժեշտ է, լոգարանով, առուշով, աւագանով բաղնիք մը, մանկավարժական կատարելագործուած վերջին դրութիւնները այսպէս կը պահանջեն։ ջանանք օդառուիլ գուիցերիական և անզիյական փորձառութիւններէն։ Ըստ իս, լաւ կ'ըլլայ որ Գերմանիայէն մասնագէտ ճարտարապետ մը բերուի ու անոր յանձնուի շինութեան գործը։

Ոմանք կը փափաքէին, որ վարժարանը փայտաշէն ըլլար, ուրիշներ քարաշէնի կուսակից էին և մաս մըն ալ, հաշտարար ողիններ, կ'առաջարկէին կէսը քարէ ու կէսը փայտէ շինել։ Ամէն ոք թուղթ մը և մատիտ մը ունէր գրպանը։

— Աղքա՛ր, կ'ըսէր մին փողոցը բարեկամ մը կեցնելով, երէկ գիշեր մտածեցի որ դուռը փոխանակ մէջանեղը շինելու, եթէ ձախ կողմը շինուի աւելի աղէկ պիտի ըլլայ, ասով կարելի է ճաշարանը երկու մէթր աւելի երկարել, տե՛ս բացատրեմ։

— Ու թուղթին վրայ քանի մը թուղթեր կը մրոտէր։

— Ո՛չ, անկարելի է, կը բողոքէր միւսը, դուռը մէջաղը պիտի ըլլայ, եթէ ըստածիդ պէս ձախ կողմը ըլլայ, ուր պիտի դնես սանդուխը, տե՛ս ճիշտ ձախ կողմը սանդուխը կայ։

Ու ցոյց կու տար իր կողմէ պատրաստուած յատակագիծ մը:

— Բայց ես սանդուխը աջ կողմը դրած եմ...

— Ես աջ կողմը տնտեսին սենեակին յատկացուցի...

— Տնտեսին սենեակը ես պարտէղին մէջ շինած եմ:

— Այդ ձեր երկու յատակագիծերն ալ փարա մը չեն ըներ, մէջ կը մտնէր երրորդ մը գրպանէն երրորդ ուրուագիծ մը հանելով, դուք ասիկա նայեցէ՞ք, տեսէ՞ք, ես դուռը երկուք շինած եմ, մին աղջիկներուն և միւսը մանչերուն համար, իսկ սանդուխը շէնքին ճիշտ մէջտեղ է...

— Ճիշտ մէջտեղը, բայց ատով շատ տեղ կը կորսուի:

— Պարապ խօսք մի ըներ, քու խելքդ չի հասնիր կոր:

Ու վիճաբանութիւնը կը շարունակուէր, մինչեւ իսկ կոիւի փոխուելով երբեմն:

Դորձնահան մարդիկ խրատ կու տային յատակագիծով չզբաղելու, մինչեւ որ շինութեան համար ըլլալիք ծախքին գումարը դիտցուէր: Բայց այս խրատին հետեւող չըկար:

— Քանի որ Սահակ էֆ. յանձն առաւ գրպանէն վճարել դպրոցի շինութեան ծախքը, անշուշտ ի՞նչ որ պէտք ըլլայ պիտի տայ, կ'ըսէին խանդավառները:

Սահակ էֆ. մտիկ կ'ընէր այդ ամէնքը, իրեն ներկայացուած յատակագիծները կը քննէր, ուանց մասին հաւանութիւն կը յայտնէր, ուրիշները կը քննադատէր, առանց սակայն վերջնական որոշումը տալու:

— Տեւական, հաստատուն բան մը շինելու է, կ'ըսէր ատեն ատեն, հոդ չէ, թո՞ղ պղոփիկ ըլլայ, բայց հաստատուն ըլլայ:

Եւ անցան տակաւին ուրիշ օրեր ու շաբաթներ. դաստուները սրոնց ամսականները կտրուած էր, ցիր ու ցանելան, տղաք շարունակեցին իրենց խաղերը և գեղացիք՝ յատակագիծի վիճաբանութիւնները: Կամաց կամաց դիտութիւններ սկսան լսուիլ:

— Ի՞նչ պիտի ըլլար այս դպրոցի վերաշինութեան խնդիրը, ե՞րբ վար պիտի առնուէր հին շէնքը, ե՞րբ պիտի սկսէին հիմնարկութեան:

— Կեցէ՞ք, սա ձմեռը անցնի, օղերը բացուին, կը հանդարտեցնէր Օհան աղան անհամբերները, և այն ատուն պաշտօնական դիմում մը ընենք... հարկաւ Սահակ էֆէնտի ալ իրեն համար մտածելիք բան մը ունի:

Գարունը եկաւ, վեց ամիս անցեր էր դպրոցին փակումէն ի վեր, ներկայանալով վարժարանի շինութեան խընդիրը մէջտեղ դրին: Սահակ էֆէնտի իր խոստումը յիշելով:

— Այս՛, անմիջապէս շինութեան ձեռնարկելու է, ըստ, այս կիրակի անպատճառ ներկայ գտնուեցէք խորհըրդարանը, Մկրտիչ խալիքային ալ լուր տուէք, որ գայ ու գործը լինցնենք:

Կիրակի խորհըրդարանին մէջ Սահակ էֆէնտի խօսք առաւ:

— Այն օրը երբ խօսք առի, ըստ, ի հիմանց վերաշինել ձեր գեղին վարժարանը իմ անհնական քսակէս, ամէնքդ ալ անշուշտ վստահ էիք, որ խոստումս անկեղծ էր և միհենոյն ատեն ազգասիրական զգացումէ մը թելադրւած...

— Հարկաւ, Սահակ էֆ., ատոր տարակո՞յս մը կայ, լսուեցաւ ամէ կողմէ:

— Արդ, շարունակեց, այս գործը հանրօգուտ և միանգամայն ազգային ըլլալով, պէտք է ամէնքդ ալ մասնակցիք անոր... սխալ չհասկցուի, դրամը ինէ... միայն թէ դուք ալ բարոյական աջակցութիւնը պիտի տաք...

— Անշուշտ, ի՞նչ ըսել է...

— Շինութեան բարոր հոգը իմ վրաս պիտի չըեցնէք. ես վաճառական մարդ եմ, հաղար տեսակ գործ ունիմ գլուխը, դրամը ես տամ, դուք ալ ձեր կարողութեան սահմանին մէջ ձեր կրցած միջոցներով պէտք է աշխատիք, դըպրոցը ազգին է, իմս չէ. ձեր զաւոկները պիտի կրթուին հոն, դուք պիտի վայելէք... Քանի՞ զաւակ ունիս, Մկրտիչ խալիքա:

— Զորս հատ, էֆէնտիս:
 — Աստուած պահէ,
 — Շնորհակալ եմ, ողջ ըլլաք:
 — Հիմա Մկրտիչ խալֆան չորս զաւակ ունի նէ՝ ըսել
 է դպրոցին շինութիւնը ամէնէն աւելի անոր օգտակար պի-
 տի ըլլայ, անանկ է նէ՝ պէտք չէ՞ որ մեծ մասնակցութիւն
 մը ունենայ այս գործին մէջ...

— Այսինքն, էֆէնտիս... շատ լաւ չեմ հասկնար կոր
 ձեր միտքը, կմկմաց Մկրտիչ խալֆան, կասկածոտ շեշտով
 մը:

— Դող մելլար, դող մելլար, պատասխանեց Սահակ
 էֆէնտի խնդալով, ես քենէ դրամ պիտի չուզեմ նիւթական
 և բարոյական... աջակցութիւն, էֆէնտիմ, նիւթական և
 բարոյական: Դուն, զոր օրինակ, խալֆա ես, ասիկա ալ
 չէնք մըն է որ պիտի շինուի և ի՞նչ չէնք, ազգին զաւակ-
 ներուն, քու և քու բարեկամներուդ զաւակներուն համար
 վարժարան մը: Եյ հիմա այս շինութեան գործը քեզի յանձ-
 նենք նէ՝ դուն փարա՞ պիտի առնես: Բնականաբար ո՛չ:
 Իմ ուղածու ալ ասկէ աւելի բան մը չէ, քենէ քու արհեստիդ
 համեմատ բարոյական աջակցութիւն մը, քիչ մըն ալ ֆի-
 զիքական յոդնութիւն...

Մկրտիչ խալֆա տասը տարիէ ի վեր հաստատուած էր
 Մ. գեղը, ուր ամէն ոք զինքը կը յարգէր: Թէև մեծ ար-
 հեստագէտ մը չէր, բայց գեղին մէջ իրեն գործ յանձնող-
 ները գոհ ձգած էր իր խղճմտութեամբն ու պարկեշտու-
 թեամբը: Նիւթապէս համեստ վիճակի տէր, բարեմիտ աշ-
 խատաւոր մըն էր, որ տարիներէ ի վեր կը սպասէր բախ-
 տին մէկ քմահաճոյքին, որպէսզի կարեւոր գործ մը ներ-
 կայանայ և մեծկակ գումար մը շահի, ու ինքն ալ իր կար-
 գին, անձնական տուն մը շինէ գեղին մէջ: Դպրոցին վե-
 րաշինութեան որոշումէն ի վեր, Մկրտիչ խալֆա կը յու-
 սար որ վերջապէս բախտաւոր ժամը հնչած էր: Գործը ան-
 շուշտ իրեն պիտի յանձնուէր և դպրոցը պիտի կառուցուէր
 մեծահարուստ բարերարի մը դրամներով, որ անշուշտ առա-
 տաձեռն կերպով պիտի անօրինէր ամէն բան, թուսալից ու

խնդումերս ընդունած էր թաղական Խորհուրդին հրաւէրը
 և եկած էր խորհրդարան խել մը ուրուագիծեր տեղաւորելով
 գրպանը:

Ու հիմա՝ իր տասնամեայ ոսկի երազները, որոնց իւ
 րականացումը ա՛լ վայելելու կը պատրաստուէր, յանկած
 կը ցնդէին:

— Բայց, էֆէնտիս, միթէ կարելի՞ է, որ ամբողջ
 գործը վրաս առնեմ առանց որեւէ վարձքի, ըսաւ աղաչա-
 ւոր ձայնով մը:

— Ազդին գործն է աս, գոչեց Սահակ էֆէնտիս, ազ-
 գային զաւակներուն վարժարանը, որուն մէջ քու զաւակ-
 ներդ ալ պիտի կրթուին: Դուն ազգասիրական զգացում
 չունի՞ս, ազգդ, հայրենիքը չե՞ս սիրեր... ես քեզի բարի,
 ազգասէր մէկը կը կարծէի:

— Մկրտիչ աղան ազգասէր է, ըսաւ մին:

— Մկրտիչ խալֆան իր ազդին ալ կը սիրէ, դպրոցն
 ալ կը սիրէ, եկեղեցին ալ կը սիրէ, ըսաւ ուրիշ մը:

— Այո՛, այո՛, պատուական մարդ է Մկրտիչ աղան,
 աւելցուց երրորդ մը:

— Ազգասիրութիւնը գործով կ'ըլլայ և ոչ թէ խօս-
 քով, պատասխանեց Սահակ էֆ.., եթէ ձեր ըսածին պէս
 իրացնէ ազգասէր ըլլար, ասանկ պզատիկ զոհողութիւն մը կը
 մերժէ՞ր...

— Զմերժեց, էֆէնտիս, չմերժեց, ըսաւ Օհան աղան:

— Ի՞նչպէս չմերժեց, առանց փարայի չեմ աշխատիր
 կ'ըսէ կոր:

— Կ'աղաչեմ, այդպէս խօսք չըրաւ Մկրտիչ աղան...
 թիւրիմացութիւն կայ:

— Հաստատական մերժում չէր:

— Այո՛, այո՛, շատ ճիշտ է, հարցական մերժում է,
 «միթէ կարելի՞ է որ ամբողջ գործը վրաս առնեմ առանց
 ուէ վարձքի» ըսաւ:

— Ծիտակ է, պարզ հարցում մըն էր իր ըրածը:

— Այո՛, հարցում մը, որուն պատասխան չտրուեցաւ...

— Եւ ասկէ առաջ եկաւ ցաւալի միջաղէպ մը, որուն պատասխանատուութիւնը մասամբ Մկրտիչ աղային կը պատկանի:

— Մկրտիչ խալֆանիս աղէկ է, բայց քիչ մը խօսելու վարժութիւն չունի:

— Ներողամիտ եղէ՞ք, Սահակ էֆ. ասանկ պղտիկ պակասութիւններու մի՛ նայիք:

— Խօսուածքը կոչտ է, բայց արհեստին մէջ վարպետ է:

Բոլոր այս խօսակցութեան միջոցին Մկրտիչ աղա ապուշ ապուշ թաղականներուն երեսին կը նայէր, առանց կարենալ բառ մը աեղաւորելու: Կը զգար որ ծուղակի մը մէջինկած էր, ուրկէ դժուարաւ պիտի կրնար ազատիլ: Բացարձակ մերժում մը իր դէմ պիտի հանէր բոլոր գեղացիները և մանաւորաբար թաղական խորհուրդի անդամները, որոնք իր յաճախորդներն էին, այսու հանդերձ վերջին փորձ մը ընել ուզեց:

— Ներեցէ՞ք, ըսաւ, եթէ ըսելիք խօսքերուս մէջ անարդար բան մը կայ...

— Ներեցինք մենք, ներեցինք, գոչեց Օհան աղան:

— Դուք ալ ներեցիք, այնպէս չէ՞ Սահակ էֆէնտի:

— Ներեալ է, ներեալ...

— Ուրեմն, յարեց Սահակ էֆ., ճարտարապետի խընդիրը լուծուած է... թաղական Խորհուրդնիս իր խորին շընորհակալութիւնը կը յայտնէ ձեզ, որ հաճեցաք անձնութերաբար դպրոցին շինութեան հոգը վրանիդ առնել: Վաղուընէ կրնաս գործի սկսիլ: Առաջին գործդ պիտի ըլլայ նախ հին շէնքը վլցնել, որչափ կարելի է շուտ, որպէսզի նոր շէնքին սկսինք... է՞հ, երթաք բարով, յաջողութիւն, Աստուած հետերնիդ ըլլայ:

— Կեցցե՛ս, Մկրտիչ խալֆա, գոչեց խանդավառութեամբ Օհան աղան, տեսա՞ք պատուական մարդը... եկուր մէյ մը ճակատով համբուրեմ:

Եւ երկու ձեռքով Մկրտիչ աղայի զլուխը բռնեց աւ ճակատէն ուժով մը համբուրեց, երեսին պղտիկ ապտակ մը տալով:

Մկրտիչ խալֆա խոնարհաւթիւն մը ըրաւ և դուրս ելաւ խորհրդարանէն:

Հետեւեալ օրը վարժարանին շէնքը սկսան փլցնել:

Գ.

Սահակ էֆ. կաչուաերեան վառքի գագաթնակէտին հասած էր: Իր անունը ո՛չ թէ միայն Մ. գեղի սահմանափակ շրջանակին մէջ կը փառաբանուէր, այլ Պոլսոյ բոլոր թագերուն մէջ:

Թերթերը, որոնք գրաքննութեան մշտահալած ուրուականէն սարսափահար, ի՛նչ զրելիքնին չէին գիտեր, սովալլուկ գահավիժումով մը նեառուած էին Սահակ էֆէնտիի բարերարութեան անմեղուկ պնակին վրայ: Բարեմիտ ընթերցողներուն հրամցուելիք անվնաս ու մարսողական կերակուր մըն էր ան, զոր կարելի էր յարդարել զանազան կերպով ու տարբեր տարբեր թացաններով: Ազգային լուր, կերպով ու տարբեր տարբեր թացաններով: Ազգային լուր, խմբագրական, իմաստասիրական յօդուած, կենսագրական նօթեր, Մ. գիւղի օդին վրայ տեսութիւններ, արձակ բանաստեղծութիւն, սահմանաւր, ֆանթեզի, բաց նամակ, վերջապէս անով ամէն բան շինեցին մեր լրադրական խոհարարները: Բժիշկ-գրագէտը՝ «Առողջապահութիւնը մեր վարժարաններուն մէջ» մը հրամցուց: Փաստաբան-գրագէտը՝ «Դալրացական օրէնսգիտութիւն» մը քշեց: բանասէրը՝ դպրոց, վարժարան, դպրատուն և ծաղկոց բառերուն ստուգաբանութիւնը ըրաւ, ճարտարագէտը գրեց իր «ի՞նչպէս պէտք է կառուցանել մեր դպրոցները»:

Սահակ էֆէնտին երջանիկ էր, անկեղծօրէն, ամբողջ օրէն երջանիկ, նախ՝ իրեն ուղղուած գրաւոր և բերանացի գրուատիքներուն համար, երկրորդ՝ այն ներքին գոհունակութեամբ, որ բարիք մը գործած ըլլալու գիտակցութիւն

Նը կու տայ մարդուս, Որովհետեւ, հոս տեղն է մեր հերոսին հոգեբանութիւնը բացատրելու, Սահակ էֆէնտի խորամանկ մը չէր որ կ'ուզէր վարպետութեամբ բարերար ձեւանալ, այլ իրապէս բարիքը սիրող և զայն կատարել փափառող մը: Միայն թէ իր շուկացիի, զործնական մարդու խառնուածքը դինքը ինքնաբուխ կերպով ու անդիտակցարար կը մէկը բարերարութեան մէջն ալ զործածելու առեւտուրի հնարքները, ինչպէս իբր վաճառական խարեբայութեամբ շահ մը ըրած ասեն ոեւէ խղճահարութիւն չէր ըզգար, այլ՝ ընդհակառակը՝ պարկեշտօրէն իր գործը տեսած ըլլալու անխոռվ գոհունակութիւնը ունէր:

Սահակ էֆէնտի նոյնպէս՝ իբր բարերար՝ շուկացիի հնարքները գործածելով, չէր նկատեր թէ պատուաւորութեան դէմ յեղանչած կ'ըլլայ: Այն բազմաթիւ «գործի մարդերէն» էր, որոնք իրենց քովի սրբուած ու անդործածելի դրամները ամենայն բարեմտութեամբ եկեղեցիին զանձանակը կը ձգեն կամ աղքատներուն իբրև ողորմութիւն կու տան:

Հոգեբանական այս վիճակին չնորհիւ, ինչպէս ըսինք, կատարելապէս երջանիկ էր Սահակ էֆէնտի և դէմքին վըրայ ներքին ուրախութեան արտարերած ճառագայթումովն էր որ յաջորդ շաբաթ եկաւ բազմիլ թալ: Խորհուրդի առենապետի աթոռին վրայ:

Հինգ վեց օրէ ի վեր դպրոցին շէնքը վլցնել սկսած էին և աշխատութիւնները առաջ կը տարուէին միծ եռանդով:

Մկրտիչ խալֆա եկած էր խորհրդարան, յուսահատ համակերպողի ողբալի դէմքովը:

— Ե՞ր, ի՞նչպէս են գործերը, առաջ կ'երթա՞ն կոր, հարցուց Սահակ էֆէնտի:

— Այո՛, պատասխանեց խալֆան, ինը գործաւոր կը բանեցնեմ կոր, կը յուսամ որ քսան օրէն շէնքը վար կ'առնուի:

— Նոր շէնքը քանի՞ ամիսէն կրնայ լմնալ:

— Առնուազն հինգ ամիս պէտք է:

— Լաւ ուրեմն, շարժնակեց Սահակ էֆէնտի, հինգ ամիս է որ արդէն վարժարանը գոց է, պաշտօնեաները ճամբուած, մէկ ամիս ալ չէնքը վար առնելը պիտի տեւէ, եղաւ վեց, հինգ ամիս ալ նոր շէնքին համար, ուրեմն տասնըմէկ ամիս վարժարան չունինք...

— Ի՞նչ վնաս ունի. Սահակ էֆէնտի, մէջ նետուեցաւ Օհան աղա, բաւ է որ հին ու խարխուլ շէնքի մը տեղ, ձեր շնորհիւ փառաւոր վարժարան մը պիտի ունենայ գեղերնիս, թո՛ղ տղաքը այս տարի քիչ մը հանգիստ ընեն:

— Ես ուրիշ բան մը պիտի ըսեմ, Օհան աղա, խօսքաղներուն համար չէ, պատասխանեց Սահակ էֆէնտի:

Ցեսոյ գանձապետին դառնալով.

— Ի՞նչ է սա դպրոցին ամսական պիւտծէն, հարցուց գանձապետին:

Գանձապետը տեսրակ մը նայել քննելէ ետքը, պատասիանեց.

— Երեսուն երկու ոսկի, որուն տասներկու ոսկին ամսականներէն կը գոյանայ, իսկ մնացած քսան ոսկին թաղին սնտուկէն կը վճարուի:

— Ճիշտ ատիկա գիտնալ կ'ուզէի կոր, շարունակեց ազգային բարերարը: Ուրեմն թաղին սնտուկը տասնըմէկ ամսուան միջոցին 220 ոսկի պարտական է դպրոցին, քանի որ ամսական 20 ոսկին դպրոցին յատկացուցած է և անորի բաւունքն է: Հիմա քանի որ դպրոցը գոց է և պաշտօնեաները ճամբուած, օրինաւոր է որ 220 ոսկին աւելցնենք թէպրոցին շինութեան համար իմ տալիք դրամիս վրայ: առով թէ թաղին սնտուկը բան մը կորսնցուցած չըլլար, քանի որ ինք այդ դրամին աւանդապահն է միայն, և թէ պատասկան ծառաւ կը կրկին իր նպատակին ծառայած կ'ըլլայ: Բանաւոր չէ՞ այս առաջարկութիւնս:

Սահակ էֆէնտի գրպանէն սիկառի տուփ մը հանեց, հատ մը ինք առաւ և մէյ մէկ հատ հրամցուց իր պաշտօնակեցներուն:

Պահ մը լոռութիւն տիրեց. ոչ ոք կ'ուզէր առաջին անգամ կարծիք յայտնել:

— Ըսէ՞ք պնդեց բարերարը, այս ըսածս այնքա՞ն պարզ ու բանական բան մըն է, որ մասածելու պէտք չկայ: Արդէն առաջարկ մը չէ որ կ'ընեմ, այլ պահանջք մը: Դպրոցը 220 ոսկի ունի թաղին սնստուկը, ես իմ վրաս առած եմ դպրոցին բոլոր հոգը, հետեւարար այդ դրամին գործածութեան կերպը որոշել իմ իրաւունքս է... կամ, աւելի ճիշտը, իմ պարասականութիւնս է:

Եւ խօսքը ուզգելով Օհան աղային, որ քովը նստած էր.

— Հէ՞, ի՞նչ ըսիր ասոր, ըսաւ:

— Դուք ինչպէս որ յարմար կը տեսնէք այնպէս թող ըլլայ, կմկաց Օհան աղա խուսափողական ձեւով մը:

Կրկին լոռութիւն: Մկրտիչ խալֆա օգուտ քաղելով այս միջնարարէն, ոտքի ելաւ ու աղաչաւոր կերպով թուղթ մը ներկայացուց:

— Եթէ կարելի է, Սահակ էֆէնտի, սա մեր հաշիւը տեսնէք, բանուորները առառընէ ի վեր դուրսը կը սպասն կոր...

Բարերարը թուղթը քննեց, բանուորներուն օրականը քիչ մը շատ գտաւ, զանազան ծախսքրու մասին մանրակրկիտ բացատրութիւններ պահանջեց, Մկրտիչ խալֆայի ուզգամտութեան վրայ կասկածելով ու կատակով խառն ակնարկութիւններ ըրաւ ու հաշիւը գանձապետին երկնցնելով.

— Երկու հարիւր տասը զբուշ է, վճարէ ու դպրոցին հաշիւին անցուր, հրամայեց,

Գանձապետը ոտքի ելաւ վարանոտ, ուզեց զիտողութիւն մը ընել և պաշտօնակիցներուն նայեցաւ, անոնցմէ քաջալերական ակնարկ մը ընդունելու յօյսով, բայց ի զուր: Եւ գլխիկոր գնաց արկղը բացաւ ու վճարեց դըրամը:

Այս գործողութիւնը վաւերացումն էր Սահակ էֆէն-

աիի առաջարկին. հետեւաբար ա'լ փակուած համարուեցաւ խնդիրը և խօսակցութիւնը դարձաւ թաղային ուրիշ ընթացիկ գործերու վրայ:

Կէսօրին մօտ ատենապետը ոտքի ելաւ և իր բոլոր պաշտօնակիցները ճաշի հրաւիրեց: Այս հրաւէրը բոլորովին ցրուեց այն տեսակ մը ճնշող նեղութիւնը, որ թաղական Խորհուրդի անդամներուն վրայ կը սաւառնէք, բարերարին յեղակարծ առաջարկէն ի վեր, և անգամ մըն ալ հաստատեց թէ՝ լաւագոյն բարերարը այն է, որուն տունը կը ճաշն:

Ամիս մը ետքը կատարուեցաւ նոր դպրոցի հիմնարկէքը: Անմոռանալի փառաւոր օր մը Սահակ էֆէնտիի համար: Առառուն Սրբազն Պատրիարքը պատարագեց և հոգեհանգիստ կատարեց ամբողջ Կաչուտերեան գերդաստանի ննջեցեալներուն համար: Քարոզին մէջ յիշեց Սահակ էֆէնտիի համեստ սկզբնաւորութիւնը կեանքի ասպարէզին մէջ, ըսաւ թէ ինչպէս իր առեւտրական հանձարովը ու պարկեցութեանը և ուզգամտութեանը չնորին կրցած էր բարձր ու նախանձելի զիբքի մը հասնիլ: Գործի մարդէն յետոյ խօսեցաւ բարերարին վրայ, բաղացած զայն եսասէր հարուստներուն հետ, որոնք զրամին կը զոհեն իրենց ազգն ու եկեղեցին, մինչդեռ Սահակ էֆ. իր զրամը կը զոհէ ազգին ու եկեղեցին համար: Վերջապէս աւելցուց թէ Սահակ էֆէնտիի բարիքները այնքան մեծ են, որ չեն կրնար իրենց վարձատրութիւնը գտնել այս աշխարհի մէջ և թէ ամբողջ յաւիտենականութեան մը երանութիւնը կընայ փոխարինել զանոնք:

Եկեղեցական արարողութենէն յետոյ, ժողովուրդը թաշփորով ուզգուեցաւ դպրոցի շինութեան տեղը, ուր կրկին աղօթքներ ու մաղթանքներ եղան: Յետոյ չորս ոչխար, զորս Սահակ էֆէնտիի բարեկամներէն մին նուիրած էր այս առթիւ, մորթաւեցան մատաղի համար:

Օհան աղա Ս. Պատրիարքին ներկայացուց Մկրտիչ խալֆան, ազգասէր ու եկեղեցասէր ճարտարապետը, որ «ու-

զած էր դպրոցի շինութեան հոգը անձնուիրաքար վրան առնել, առանց նիւթական ամենափոքր վարձատրութեան մը»: Պատրիարքը օրհնեց այդ «առաքինի ու պարկեշտ» աշխատաւորը և կարողութիւն մաղթեց իրեն:

Մկրտիչ խալֆա, հաւատացեալ մարդ, մոոցաւ իր դառնութիւնները, ֆէսը հանեց և երկիւղածօրէն Պատրիարքին ձեռքը համբուրեց, դուանալով իրեն բաժին ինկած գոնէ այդ հոգեկան վարձատրութեանէն:

Յորեկը, Սահակ էֆէնտիփ տան մէջ երեսուն հոգիի սեղան մը տրուեցաւ, նախագահութեամբ Պատրիարքին: Բաժականառեր արտասանուեցան կաչուտերեան ընտանիքին բոլոր ներկայ ու բացակայ անդամներուն կենաց, Զմոռացուեցաւ նոյնիսկ փոքրիկ Վահանիկը, որ իր անբաժանելի գանձանակովը եկաւ Պատրիարքին ձեռքը համբուրելու:

Ինչ որ անուշաղիր անցաւ այդ ամէն խրախճանութեանց մէջ, սա էր թէ հիմնարկէքը կեղծ հիմնարկէք մըն էր: Սահակ էֆ. դպրոցին շէնքը վար առնուելէն ետքը, հիմունքը քննել տուած էր Մկրտիչ խալֆային, հասկնալու համար որ կարելի չէ՞ր անոնց վրայ բարձրացնել նոր շէնքը: Դորեծը եթէ բանավաստակ մը չըլլար, ճարտարապետը անշուշտ, իր շահունահամար, պիտի յայտարարէր որ «ի հիմանց» պէտք էր կատարել վերաշինութիւնը, բայց ժամ առաջ օձիքը ազատելու համար աշխատութեանէ մը, որ պարզապէս բեռ մըն էր իրեն համար, շատ հստատ գտաւ հիմերը և լաւագոյն համարեց անոնցմէ օգտուիլ: Սահակ էֆ. կրկնել չտուաւ ճարտարապետին գնահատումը և անմիջապէս որոշեց որ հին հիմերուն համեմատ զծուի շէնքին յատակագիծը:

Ահա այսպէս, հիմնարկէքը պարզապէս նախկին հիմերուն վերահաստատութիւնն էր իրենց պաշտօնին մէջ: Ասիկա առ նուազն վաթուն սովորի խնայողութիւն մը կը ներկայացնէր գործի մարդ բարերարին համար:

Քանի մը շաբաթ ետքը, լաստակերաը արդէն աւարտած էր ու շէնքը արագ արագ կը բարձրանար և սակայն

դպրոցին սահմանուած դրամը կը սկսէր հատնիլ և Սահակ էֆ. ստիպուած էր թաղական խորհրդի սնաուկին փոխ դըրամ տալ, որպէսզի գանձապետը կարենայ շաբաթական ծախքերը վճարել Մկրտիչ խալֆային:

Բարեբարը օրն ի բուն գլուխը կը ճաթեցնէր հնարք մը գտնելու համար. վերջապէս գտաւ: Անդրանիկ աղջիկը՝ Զարուհի՝ ձեռագործ գորդ մը բանած էր. զայն վիճակահանութեան դրաւ:

— Աղջիկս անպատճառ ուզեց որ ինքն ալ բաժին մը ունենայ վարժարանի շինութեան մէջ, կը բացատրէր իր շուկայի բարեկամներուն, մէկ ոսկինոց տոմսակներ ներկայացնելով. շատ համոզեցի որ վազ անցնի այդ գաղափարէն, բայց օգուտ չըրաւ. անուշ խօսեցայ՝ չեղաւ, խիստ խօսեցայ՝ չեղաւ, վերջապէս տեսայ որ սիրաը պիտի կոտրի, աղուոր ձեռագործ մը բաներ էր, ա՛ո վիճակահանութեան դիր, ըստաւ: Աղբար, ի՞նչ պիտի ընես, չօնուխ են, խօսք չեն հասկնար. ասկէ զատ, մտածեցի որ ուզածը դէշ բան մը չէ, ինք ալ բարիք ընել կ'ուզէ կոր... ինչ որ է, ա՛ո սա տոմսակէն մէկ քանի հատ Զարուկին խաթերը համար, ես ալ ժամ առաջ սա պէլայէն ազատիմ... գործս ձգեր եմ տոմսակ կը ծախեմ կոր, թէք աղջկանս սիրաը չկոտրելու համար: Հսի իրեն որ 100-120 սոկին ես գրպանէս տամ ու բոլոր տոմսակները ես առնեմ լիննայ. ոտք կոխեց, չէ՛ ըստաւ, «այն ատեն նորէն դրամը դուն տուած կ'ըլլար ու ես բան մը ըրած չեմ ըլլար» կ'ըսէ կոր... Թօնափ աղջիկ մըն է մեր Զարուկ», միտքը բան մը դրաւ մի, անպատճառ կատարուելու է, կամքի տէր է... ինծի պէս:

Բարեկամները ստիպուեցան աեղի: տալ Զարուհիի կամքին առջև: Սակայն Զարուհիի կամքէն յիտոյ Վահանիկիի կամքը մէջաեղ ելաւ: Վահանիկ, ըստ Սահակ էֆէնտիի մեկնութեան, արժանապատութեան վիրաւորանք մը զգաց տեսնելով որ քոյրը մասնակից կ'ըլլայ վարժարանի շինութեան և ինք անմասն կը մնայ անկէ: Վահանիկի սրտամտութիւնը հետզետէ բորբոքեցաւ. ինքն ալ կամքի տէր էր իր

հօրը պէս։ Հայրը տեսնելով որ անկարելի էր տղուն խօսք հասկցնել, որոշեց գանձանակը բանալ և հաւաքուած գումարը, իբր Վահանիկի բաժինը, ծախսել վարժարանին։ Ասով՝ Վահանիկի վերաւորեալ արժանապատութիւնը հատուցում մը ստացած պիտի ըլլար և տան մէջ վրդովեալ խաղաղութիւնը պիտի վերահաստատուէր։

Մկրտիչ խալֆայի կանխատեսութեան համեմատ, վարժարանի շինութիւնը հինդ ամիսէն աւարտեցաւ։ Ներկը, պատուհաններն ու գուռները կը մնային։ բարեբախտաբար հայ արեհստաւորներ չէին պակսեր Մ. գեղին մէջ։ Ներկար, ատաղձագործ, երկաթագործ, եւայլն, կիրակի օր մը Սահակ էֆ. հրաւիրեց զանոնք խորհրդարան, իրենց պարտականութեան կոչում ըրաւ։ ըստ թէ վարժարանը իրենց համար շինուած է, թէ իրենց գտակները պիտի կրթուէին հոն։

— Այս դպրոցը ես շինեցի, այս՝ գոչեց, բայց ես ինձի պիտի չպահեմ, այլ ձեզի պիտի նուիրեմ, ձեր ստացուածքը պիտի ըլլայ, գուք պիտի ըլլաք անոր տէրը, հետեւաբար իբրև տանտէր պէտք է հիմակուընէ հոգ տանիք անոր, զուք ալ քիչ մը զոհողութիւն ըրէք... Մեծ բան մը չեմ պահանջեր, բայց դոնէ պատերուն ներկը, դոներն ու պատուհանները պէտք է զուք լմնցնէք։

Ազգին տունն է այս, միթէ կը վայլէ՞ որ դրամ ուզէք, չէ՞ մի որ ձեր աղաքը հոն ձրիաբար կը կրթուէն... .

Ու պարկեշտ աշխատաւորները չհամարձակեցան դիտողութիւն մը ընել, իրաւացի գտան իրենց գեղի բարերարին ըսածները և գլխի հաւանող շարժումներով ստորագծեցին իր ըսածները։

— Ես կը սպասէի որ, շարունակեց բարերաբը, դուք առանց հրաւէրի, ինքնին պիտի գաք ձեր պարտականութիւնը կատարելու։

Այս խօսքերը վերջին հարուածը տուին խեղճերուն, ամօթահար ներում ինդրեցին պակասութեան մէջ գտնուած

ըլլալնուն համար և խոստացան իրենց մեղքը քաւել անմիջապէս։

Ու ամիս մը ետքը վարժարանը աւարտած էր իր ամէն մանրամասնութիւններովը։

Երբ Սահակ էֆ. հաշիւները նայեցաւ տեսնելու համար թէ վարժարանի շինութեան համար ինք անձնական դրամէն ի՞նչ ծախսած էր, գոհունակութեան ժպիտով մը հաստատեց թէ՝ երեսուն սոսկին չէր անցած։

Բարերաբը տեղի չէր տուած վաճառականին առջեւ։

Նոր վարժարանին բացման հանդէսը իր շքեղութեամբ մոռցուց կիմարկէքը, Սահակ էֆէնտի, այս անդամ, պաշտօնապէս իշխանութիւն ներկայացուցիչներուն բերնով «Ազգային բարերաբ» հոչակուեցաւ։ Ամէն անդամ որ իր անունը կ'արտասանուէր, ծափահարութիւնները կ'որոտային։ Ու բարի մարդը յուզուած այդ համակրական ցոյցերէն՝ կու լար։

* *

Սահակ էֆէնտի տակաւին քանի մը տարի ապրեցաւ, հանդարտօբէն վայելեց իր բարերաբութեանց արդիւնքը, երախտագիտութեան մթնոլորտի մը մէջ։

Եւ շարունակեց իր բարիքները։
Վահանիկ նոր գանձանակ մը առաւ, որուն մէջ հաւաքուած դրամով դպրոցի երեք աղքատ աղոց հագուստ կը շինուէր Զատկէ Զատկի։

Անօժիս աղջիկներու համար, մեր բարերաբը երբեք չվարանեցաւ իր բարեկամներուն դիմում ընելու։ Ուշիմ պատահիները միշտ իր գով գտան երազուած բարերաբը, զիրենք Եւրոպա ղրկելու խոստացող։

Չքաւորները Սահակ էֆէնտին միշտ պատրաստ գտան զիրենք աղքատախնամին յանձնարարելու։

Կնճոստ դժուարութեանց, դատական խնդիրներու կամ ամուսնական վէճերու տակ ձնշուտղները ազատ մուտք ու-

նեցան իր մօտ և Սահակ էֆէնտի չէր յոգներ իր փորձառու
մարդու խրատները անոնց տալէ:

Ու օր մըն ալ, աւա՛ղ, մեռաւ Սահակ էֆէնտի կաչու-
տերեան:

Հիմա կը հանդէի հո՛ն, իր կառուցած վարժարանին
բակը:

Զինքը ծածկող մարմարը անջինջ տառերով կը պատմէ
իր մեծագործութիւնները և աշակերտները տարին անգամ
մը կ'երթան ազօթել իրենց բարերարին դամբարանին վը-
րայ:

Հանգիստ իր ոսկորներուն,

ՎԵՐՋ

«Ազգային գրադարան



NL0224668

Ե 1300

“ՄԱՍԻՍ” ԳՐԱՏԱՆ ՀՐԱՏԱՐԱԿՈՒԹԻՒՆՆԵՐԸ

	Լիլ
1. Ասուր-Նազիր-Աբալ	Կ. ՄԵԶԵԱՆ 10
2. Մեծապատճ Մուրացկանները	Յ. ՊԱՐՈՆԵԱՆ 30
3. “Մասիս”, Տարեգիրք Ա. Տարի	Ա. ՍԵՒԱՆ 100
4. Թանկազին Համբոյր (Կակերգ. 1 արար)	10
5. Գիրուկ Մարդուն Հանոյինները	ՈՒ. ՃՈՂՍԸՆ 15
6. Հռոմի Պապին Զաւակները,	Մ. ԶԵՎԱՔՕ 150
7. Գուշակը (Երգիծավեպ)	ՄԹ. ՔՈՍԹՈՎ 20
8. “Մասիս”, Տարեգիրք Բ. Տարի	Ա. ՍԵՒԱՆ 100
9. Հրացեներու Պալատը	Մ. ԶԵՎԱՔՕ 150
10. Խելազար Հայուհին	ՏՈՒԹ. ՃԵՎԱԼԵԱՆ 65
11. Մուսա Լերան 40 Օրերը Ա. Բ. Հատոր ՖՈ. ՎԵՐՖԵԼ 400	
12. Ռակասրէնի Ասպետը	Մ. ԶԵՎԱՔՕ 150
13. Հին Հայ Բահաստեղծութիւնը	Գ. ԳԵՂԱՐՔՈՒՆԻ 30
14. Հայ Սղեռնը	Մ. ՆԵՑԻՄ 20
15. Թարզան	ԷՏԿԱՐ ՌԱՅՍ ՊՈՐՈՈՒ 50
16. Յոյն Լրտես. Գործունեութիւնը	ՊՈՂՍՈՅ ՄԵԶ 20
17. Վ. Ի. Տօֆ	ԱՐԹԻՒՐ ՊԵՐՆԵՏ 100
18. Վարդան Մամիկոննեան	ՕՆ. ՄԵԽԻԹԱՐԵԱՆ 20
19. Սիրոյ Մը Վեպը	ՕՆ. ՄԵԽԻԹԱՐԵԱՆ 10
20. Նահանջ	ՕՆ. ՄԵԽԻԹԱՐԵԱՆ 10
21. Արամ Մանարեան	ՕՆ. ՄԵԽԻԹԱՐԵԱՆ 12
22. Կարմիր Յորձանք	ՕՆ. ՄԵԽԻԹԱՐԵԱՆ 50
23. Պաղտասար Աղբար (Կակերգ. 3 արար)	Յ. ՊԱՐՈՆԵԱՆ 35
24.— Ազգային Բարերար	Ե. ՕՏԵԱՆ 15



ԱՐՏԱՍԱՀՄԱՆ 5 ՖՈ. ՖՈ.